

李文忠公全集

奏稿

二十



李文忠公奏稿

卷之二十五目錄

丁憂道員懇准終制摺 光緒元年正月十九日

淮軍雜支分別核辦片 光緒元年二月十二日

輪船招商請獎摺 光緒元年二月二十七日

宣化無兵防塔城摺 光緒元年三月十三日

福濟請卹摺 光緒元年三月二十三日

調兵助剿奉省摺 光緒元年四月初九日

劉盛藻回籍終制片 光緒元年四月初九日

陳蘭彬議辦華工片 光緒元年四月十二日

防軍試墾稻田片 光緒元年四月二十九日

會國藩請建省城專祠摺 光緒元年四月二十九日

督辦北洋海防謝摺

光緒元年五月初十日

防邊各軍仍准給雜支片

光緒元年五月初十日

張家口糧臺請部餉摺

光緒元年五月十七日

籌濟奉省軍火片

光緒元年六月初六日

德國兵官請給寶星片

光緒元年六月初六日

祕魯換約摺

光緒元年六月十一日  
附鈔件

請派丁日昌商辦換約片

光緒元年六月十一日

周盛傳陳濟清互調片

光緒元年六月二十九日

自省遞津添驛片

光緒元年六月二十九日

祕魯換約事竣摺

光緒元年七月初八日  
附照會照覆清單

請遣使赴祕魯片

光緒元年七月初八日

嚴防誘拐華民片

光緒元年七月初八日

淮軍西征報銷摺

光緒元年七月二十八日  
附清單

軍營交涉洋務銷冊片

光緒元年七月二十八日

軍營柴草議價核發片

光緒元年七月二十八日

西征扣曠片

光緒元年七月二十八日  
附清單

李文忠公奏稿卷二十五

全集一之二十五

桐城吳汝綸編錄

丁憂道員懇准終制摺

光緒元年正月十九日

奏爲丁憂道員籲懇

恩准扶櫬歸葬在籍終制恭摺據情代陳仰祈

聖鑒事竊臣於正月初一日由京旋省接據遇缺題奏按察使前

天津道丁壽昌稟稱恭閱邸鈔同治十三年十二月二十四日奉

上諭御史李桂林奏請將丁憂道員破格留用一摺前任天津道

丁壽昌現在丁憂開缺既據奏稱該員潔己愛民輿情感戴著俟

百日孝滿後准其留於直隸交李鴻章差遣委用該部知道欽此

聞

命之下感激涕零惟念壽昌係屬孤子並無同胞兄弟自幼失恃

賴親父撫育教誨得以成立少出就傅問視既疏中歲從戎睽違  
更久近年迎養道署方期稍盡烏私乃親父遽爾見背生已不能  
盡養歿若不克終制何以爲子何以爲人本擬卸篆後卽行扶櫬  
歸葬緣經手公件尙未交代清楚兼奉親父遺命回里道遠須由  
水路南行時值冬令河凍俟春融扶柩匍歸守制茲忽奉留直委  
用

諭旨哀迫焦惶罔知所措伏思

聖朝以孝治天下卽軍營奏留丁憂人員事竣仍令回籍補行守  
制定例綦嚴況直省現無軍務差委正不乏人竊計壽昌居喪之  
日無幾報

國之日甚長叩乞據情奏懇

恩施俯准扶櫬歸葬在籍終制一俟服闋遵

旨來直聽侯差委等情前來臣查丁壽昌自同治元年隨臣帶勇  
勦賊疊次蕩平粵捻功績頗多迨九年委署天津道適值民教滋  
事撫循彈壓威惠兼施嗣補授是缺津郡連年水災百姓蕩析離  
居該道力籌賑卹扶危濟困全活甚眾開河築隄興利除害百廢  
具舉遠近感頌上年十月丁父憂解職士民遮道攀留如失所依  
臣在津目擊情形曾面商該道扶櫬歸葬後當再奏調來直以慰  
民望該道堅辭請准終制未忍拂其孝思是以上年十一月津郡  
紳耆李世珍等合詞赴臣行轅稟留當經照例批駁旋奉  
特旨准俟百日孝滿後留直差遣嗣後丁憂人員不得援以爲例  
仰見

朝廷愛惜人才慎重地方至意臣於上年十二月二十六日  
陛辭時仰蒙



兩宮

皇太后垂詢丁壽昌官聲甚好臣具以實對方幸襄助得人乃出京後卽據該道稟陳前因情詞懇迫委係出於至誠現計該道自見喪之日起迄今已逾百日而父柩未歸人子之心惘然有所難安合無仰懇

聖恩准其扶櫬歸葬終制俟服闋後來直委用以示格外體恤如該道未屆服闋直境或有緊急要務必須助理再由臣隨時酌核奏調是否有當伏乞

皇太后

皇上聖鑒訓示遵行謹

奏

淮軍雜支分別核辦片

光緒元年二月十二日

再臣前奏淮軍柴草油燭用款請照案核銷一片奉

硃批著照所請戶部知道欽此經戶部將已入奏銷之西征第一案自同治九年四月起至十年十二月底止柴草油燭銀兩遵旨准銷並以軍需例載官兵日給口糧量給柴薪以資食用並無柴草油燭折價名目嗣後軍需報銷須照定例章程辦理所有此項柴草油燭折價應即刪除等因於同治十三年十月二十九日奏明知照前來臣維定例官兵於日給口糧外量給柴薪原爲體恤兵艱免致騷擾百姓蓋口糧無多未能兼顧炊爨之費若令自行樵采則一草一木無非小民辛苦所餘豈容軍民爭取況各軍現多分紮臺灣天津上海等處海濱斥鹵實亦無可樵采至油燭爲巡更放哨所必需更難歷久賠補向來綠營武職歲支之項有

俸銀又有薪銀及蔬菜燭炭等銀皆詳載則例軍士效力行間親冒霜露鋒鏑較之綠營武職艱苦十倍若不量予支項焉能得其死力此項柴草油燭本歸正用並非濫支例內固早有此名目湘淮各軍酌予支給折價係仿照例意辦理節經奏報准銷有案今戶部既令嗣後一律刪除應於此次奉文後從光緒元年正月起暫行停支另照例章核辦所有同治十三年以前循案已經發過淮軍各營柴草油燭折價銀兩係在未奉部文截止以前該弁勇等久經領用礙難紛紛追回致紊軍令合無仰懇

天恩敕部俟造報時仍照案核銷以清界限而免轉轄理合附片陳請伏乞

聖鑒訓示謹

奏

輪船招商請獎摺

光緒元年二月二十七日

奏爲前保輪船招商出力員紳與津通驗收轉運漕糧人員無涉  
謹詳細聲明仍請照擬給獎恭摺仰祈

聖鑒事竊臣前因創辦輪船招商在事員紳歷年苦心經營有裨  
大局於上年漕竣時擇尤奏請獎敘聲明與津通驗收轉運漕糧  
人員無涉應不併計等因並以此事實關海防根本洋務樞紐鈔  
奏咨請總理各國事務衙門查核各在案茲吏部以未將緣何與  
津通驗收轉運人員無涉應不併計之處詳細奏明應令覆奏再  
行核辦等因知照到臣伏查各國通商以來火輪夾板日益增多  
行駛又極迅速中國內江外海之利幾被洋人佔盡且海防非有  
輪船不能逐漸布置必須勸民自置無事時可運官糧客貨有事  
時裝載援兵軍火藉紓商民之困而作自強之氣且各口華商因

無官辦章程多將資本附入洋商輪船股內尤非

國體所宜臣於同治十一年五月開議覆製造輪船未可裁撤摺  
內曾籌及商船一節經總理衙門奏覆應由該督撫隨時察看情  
形妥籌辦理復函屬遜諭有心時事之員妥議章程等因臣卽於  
是年夏閒商令道員朱其昂等酌擬輪船招商章程設局招徠俾  
華商原附洋商股本歸併官局購造輪船運糧攬貨以濟公家之  
用略分洋商之利緣此事本係創始凡聯絡官商招集股本選買  
船隻雇用管駕並於各口建立棧房碼頭事體極爲煩重籌辦極  
爲艱難華商初猶觀望洋人又復嫉忌往往跌價相爭非開誠布  
公堅持定見不足以服眾而自立該員紳等苦心經營力任艱鉅  
竟底於成頻年疊加開拓漸收利權計有自置輪船並承領閩廠  
輪船八號現又添招股分向英國續購兩號分往南北洋各海口

及外洋日本呂宋新嘉坡等處貿易疊次裝運江浙漕糧上年秋  
閒承載銘軍赴臺灣轉運糧餉源源接濟均能安速無誤從此中  
國輪船可期暢行實爲海防洋務一大關鍵所裨於

國計民生殊非淺鮮該員紳等不無微勞足錄自應及時鼓勵臣  
前奏運漕出力不過略舉一端要之創辦輪船招商勞績非尋常  
局務等項可比更與津通驗收轉運人員絕無干涉應不併計相  
應詳細聲明仰懇

天恩准將原保道員朱其昂等照擬給獎以資觀感理合恭摺覆  
陳伏乞

皇太后

皇上聖鑒訓示謹

奏

Blank manuscript page with vertical lines.

宣化無兵防塔城摺

光緒元年三月十三日

奏爲宣化官兵不敷分布難再調赴塔城駐防恭摺覆陳仰祈

聖鑒事

竊臣

承准軍機大臣字寄光緒元年二月初十日奉

上諭英廉奏大同官兵業已到防宣化官兵五百名尙無起程信息請飭派往等語著李鴻章查明酌量調撥等因欽此遵查前奉同治十二年八月十六日

寄諭榮全英廉奏查看額魯特官兵並沿途臺站情形請調宣大官兵駐防塔城各摺片塔城向有甘省換防兵七百名駐紮防守近因道路未通難以調派著暫於宣化官兵內挑撥五百名赴塔駐防俟嘉峪關道路疏通再照舊章由甘省撥兵換防等因欽此當卽恭錄轉飭宣化鎮總兵王可陞欽遵安辦惟查宣化鎮原設額兵五千數百名自近年口外多事征調頻仍現計底營僅存二



千一百餘名不及原額之半該鎮東鄰熱河西通晉隴直接歸綏  
北抵察哈爾沙漠游牧邊牆綿亙千餘里實爲近畿屏蔽沿邊一  
帶時有馬賊窺伺多倫廳又孤懸口外五百餘里汛地處處緊要  
兵力殊形單薄且營路當衝本有遞送差務加以西北各路軍營  
糧餉軍火改從張家口出邊撥兵護送絡繹於道而該鎮練軍復  
調赴庫倫一千名僅存馬步七百餘名巡防口隘萬不可少同治  
十二年正月間臣覆奏烏里雅蘇臺調兵案內欽奉

上諭宣化古北口存兵無多捍衛畿輔彈壓地方未便再議抽調  
烏城儻必須步隊協防仍著咨商張廷岳等於庫防練軍內酌量  
抽撥就近赴烏等因是年八月間臣請留宣化原駐烏城防兵並  
挑派換班官兵案內復將該鎮存兵無多無可再議抽調情形陳  
明在案是以續奉塔城調兵之

旨因無兵可調疊經奏明在先遂未再行覆陳茲奉

諭仍飭臣查明酌量調撥伏查宣化出張家口西至塔城共一百十餘臺計在萬里之外兵士遠行遲滯糜費甚多當此度支艱難臺站疲乏亦不得不酌度緩急英廉等本因甘省道路未通暫調宣大官兵係屬一時權宜之計並奉有嘉峪關道路疏通照舊由甘省撥換之

諭目下肅州克復甘省肅清已久兵力可分金順一軍早抵巴里坤計過嘉峪關二千餘里道路實已通行且甘省額派塔城換防兵七百名今大同派往五百名僅短二百名似應欽遵前奉

諭旨仍照舊章由甘省就近派往以符定制儻將來塔防必須添調直兵應請於調駐庫倫之宣化古北口練軍二千名內酌量抽撥若干移緩就急亦屬兩便所有宣化存兵不敷分布實難再調

緣由理合恭摺覆陳伏乞

皇太后

皇上聖鑒訓示謹

奏

福濟請卹摺

光緒元年三月二十三日

奏爲已故大員勲勞卓著懇

恩開復原官優予

賜卹以彰忠盡恭摺仰祈

聖鑒事竊查頭品頂戴原任烏里雅蘇臺將軍福濟於光緒元年

三月初十日在旗病故查該故員於道光年間由翰林擢任吏戶

兵工各部侍郎久躋清要洊膺外任咸豐四年由漕運總督蒙

文宗顯皇帝調授安徽巡撫其時正值廬州失陷前撫臣江忠源

殉難之後皖北糜爛已極賊氛徧地一夕數驚該故員草創軍旅

收集潰散與提臣和春鄭魁士等竭力商辦勉圖恢復踰年攻克

廬州府城又疊克含山舒城三河巢縣廬江各城隘稍足自立而

兵力既單餉源奇絀於萬難措手之際設法經營徒以忠義血誠

激勵飢軍捍禦狂寇五年之間屢瀕危險卒能支持大局俾烽火  
殘黎不致淪陷其保障江北之功誠不可泯同治三年復奉

命督師川北籌措兵食撫輯流亡心力彌瘁嗣由西甯辦事大臣  
調任布倫託海科布多烏里雅蘇臺各處邊塞馳驅無一非困慮  
危心之境九年在將軍任內因公獲咎旋蒙

穆宗毅皇帝鑒其無他

加恩賞還原銜花翎在案伏念該故員受

命撫皖臣正奉

旨籍辦理團防朝夕追隨共事最久親見其艱苦困厄實非人  
所能堪而治軍之暇整飭吏治存問瘡痍事事皆求實際遺愛在  
人兩淮父老至今猶追慕之該故員清勤正直宣力中外幾四十  
年每以受

恩深重未能圖報爲憾且其家屬前在烏城同時殉節回旗後僅有孤孫善佺一人侍奉因軍營年久積受寒溼腿疾增劇遽爾病歿身後蕭然殊可惻惻竊查近年如前貴州撫臣張亮基前陝西撫臣劉蓉前湖南撫臣惲世臨前安徽撫臣翁同書皆以被議人員身故後由各督撫臣查明勞績奏蒙

特恩開復原官分別議卹該故員老成碩望歷事

三朝政績卓著其撫皖辦賊最久而勳勞亦多臣籍隸皖省知之尤詳用敢據實瀝陳可否仰懇

天恩准將頭品頂戴原任烏里雅蘇臺將軍福濟開復原官敕部照將軍例從優議卹以彰忠盡出自

逾格鴻慈所有已故大員勳勞卓著懇

恩賜卹緣由理合恭摺具陳伏乞

皇太后

皇上聖鑒訓示謹

奏

調兵助剿奉省摺

光緒元年四月初九日

奏爲遵

旨調撥馬步練軍馳赴奉省助剿恭摺覆陳仰祈

聖鑒事竊臣承准軍機大臣字寄光緒元年四月初四日奉

上諭崇實奏邊匪盤踞請調馬步練軍及時剿撫一摺著李鴻章

卽於直隸調撥步軍洋鎗礮隊一千名馬隊五百名由海道星速

前往並著選派得力巡哨大輪船二隻駛赴大東溝後各海口以

資策應等因欽此遵查直隸練軍無多餉源支絀本難遽調遠役

惟奉省爲

國家根本重地目下剿匪喫緊應卽移緩就急暫行調撥以顧大

局當經酌派天津鎮總兵陳濟清所部雲字馬勇兩營計四百名

又天津練軍洋鎗步隊兩營計一千名共合馬步四營一千四百




名陳濟清樸誠勇幹久經行陣卽併交該總兵統領迅速前往馬  
隊由陸路分起出關步隊由輪船分載進發歸崇實節制調遣所  
需月餉各項飭海防支應局照章核支源源籌濟軍火鍋帳一切  
亦飭作速備齊其步隊航海雇用輪船價銀並由支應局核給彙  
報至北洋巡哨輪船營口本有涓雲一號現已開赴孤山洋面協  
勦臣復飭該管帶官屠宗年卽聽崇實調遣另派津口鎮海輪船  
飭管帶官千總陸倫華隨後駛往策應所遺天津鎮總兵員缺緊  
要查有記名提督鄭國魁樸實老練謀勇兼優檄飭該員接署以  
便陳濟清卽日交卸統軍啟行至此項練軍馬步隊皆爲津郡海  
防而設地當衝要未可日久空虛臣已緘商崇實俟奉省勦賊稍  
有就緒卽令凱撤回津俾資控扼除分咨查照外所有調派馬步  
練軍赴奉省助勦緣由理合恭摺由驛覆陳伏乞

皇太后

皇上聖鑒謹

奏



劉盛藻回籍終制片

光緒元年四月初九日

再布政使銜遇缺題奏按察使劉盛藻自同治十一年冬開遵旨赴陝接統銘軍實力整頓克成勁旅嗣該臬司在營聞訃丁憂經前陝西撫臣邵亨豫奏奉

上諭飭令劉盛藻將陝防事宜照常辦理俟甘境肅清再奏請回籍終制等因欽此嗣肅州克復又

奏准給假兩箇月回籍營葬上年日本構釁生番經臣

奏派記名提督唐定奎率所部洋鎗隊十三營赴臺防剿並調劉盛藻迅統銘軍馬步各營馳赴山東濟甯及江南徐州一帶扼紮以備南北海防策應該軍抵防以後卽撥吳宏洛五營駐防上海吳淞要口其餘分布徐濟各處布置策應尙臻周密復據該臬司籲懇回籍終制等情請

奏前來臣查該臬司治軍嚴整統率銘軍十餘載立功最多前次  
丁憂留營本因陝防喫緊茲該軍檄調東來軍務稍鬆自應欽遵  
前

旨准暫回籍終制以遂孝思所遺銘營查有記名提督劉盛休樸  
誠勇敢曉暢戎機前曾代統銘軍經理營務辦理妥協將士亦深  
悅服堪以委令接統除仍由臣隨時督飭認真訓練察酌調遣外  
理合附片陳明伏乞

聖鑒謹

奏

陳蘭彬議辦華工片

光緒元年四月十二日

再臣於同治十年七月間會同前大學士兩江督臣曾國藩奏派委員四品銜刑部主事陳蘭彬江蘇候補同知容閔攜帶幼童出洋肄業陳蘭彬等卽於十一年夏間帶領頭批幼童赴美國哈富地方寄居分派各館學習文藝十二三年復選各省聰穎子弟分起送往本年續送四批已符奏定一百二十人之數疊據陳蘭彬等稟稱駐洋各幼童肄業洋文粗有蹊徑俟其嫻熟卽須就性質所近分門別類專心研求以裨實用該委員等布置督率悉臻周妥惟上年總理各國事務衙門因古巴招工陵虐華人奏派陳蘭彬就近往查事竣仍檄調該員回京以備與日斯巴尼亞使臣辨證一切該員自十二年冬馳赴古巴去冬回京馳驅險遠辛苦備嘗以致照料幼童未能兼顧現在總理衙門正與各國公使議辦

古巴華工章程實賴該員從旁贊助勢難遽離而幼童駐洋事宜亦關緊要自應遴派妥員速往接辦以昭慎重查有工部候補主事區諤良籍隸廣東由翰林院庶吉士改授部曹年力正壯志趣堅卓洋務亦頗講求堪以委令出洋會同原派委員容閱常駐美國經理幼童肄業各事藉資造就擬請

旨敕下總理衙門暨工部仍照出差人員向例辦理將來如有成效再由臣等從優酌保以示鼓勵至陳蘭彬識力誠毅廉正可靠駐洋三年籌辦要務均極精詳擬俟古巴華工定案後請由總理衙門酌核保奏俾旌勞勩嗣後若駐洋幼童有必須該員前往經理之處或另有海外差遣要件該員雖年已六旬當可勉力一行除咨南洋通商大臣知照外理合附片具陳伏乞

聖鑒訓示謹

奏

卷二十一

五





防軍試墾稻田片

光緒元年四月二十九日

再臣欽奉同治九年十月二十日

上諭畿輔水利本宜講求而畿東尤亟應如何設法宣洩以利農田著次第興辦等因欽此當經臣於裁撤三口通商大臣酌議應辦事宜先陳大略摺內聲明妥籌試辦並歷年督飭地方官於各河道上下游濬河築隄興復水利疊經奏陳在案惟查津郡自元時設官耕屯後旋作旋輟迄少成效固由海濱斥鹵難濬易淤亦由地利人工開墾未盡如法咸豐九年親王僧格林沁督兵津郡於鹹水沽營田三千五百四十畝葛沽營田七百五十畝同治三年前通商大臣崇厚復派員勘辦由官給賞招佃承種同治八年職員趙佩蘭呈請交銀認種不領官本每年交租二百石詎十年以後疊遭水患田廬耕具漂沒無存經臣節次奏免租項而趙佩

奏稿二一五  
五  
蘭以田畝全荒無力承墾呈請退佃由天津道吳贊誠委勘屬實  
詳請咨部暫停租課另行設法招墾至軍糧城稻田同治五年崇  
厚遵

旨試墾四百七十餘頃計成熟者不過十分之一亦因連年被水  
漸就荒蕪據天津道詳請改歸練軍及護衛營勇試墾此民墾水  
田難得實效之明驗也惟是津東鹹水沽一帶荒地承種無人曠  
廢可惜只有激厲防軍倡率興辦臣商令統帶盛仁等營遇缺題  
奏提督廣西右江鎮總兵周盛傳於上年修築新城之暇往來察  
勘先在新城以南挑濬引河一道分建橋閘溝洫涵洞試墾萬畝  
稍有收穫本年該鎮復督飭弁勇增挑鹹水沽以下引河四十餘  
里面寬六丈底寬二丈達於新城外河分注各溝順城東開口入  
海河並建石閘三座大橋四道於田閒搭造莊房以便耕作本年

暫就引河兩岸開田疏溝由近及遠據勘明海河附近閒有墾熟地段其餘南至祁口東逾葛沽新城百里內外皆爲廢地閒有民人認過竈糧草課爲數無多且有自明季認墾刻下旣非本主又已荒廢者除鹹水沽左近借用民間旱糧地畝已分別等差折價給領其向未墾熟之地仍酌給種費以示體恤惟目下雖就軍力試墾而開河建閘挑溝築圩以及買牛蓋屋添置農器水車需費甚鉅姑於該軍月餉內設法挪墊俟稻田有收陸續歸扣以資軍食現開地段內有民戶認過竈糧草課若干俟查丈清楚飭縣銷除糧額暫由該營照數完納至將來荒田墾熟後如何分給民種按則升科容再體察情形妥議章程具奏伏查津郡爲京畿屏蔽現值海防緊要力圖富強則開辦屯田籌備軍食無事時藉興秣稻之利有事時可限戎馬之足實爲經久良圖臣與周

盛傳再四諮議欲既新城附近荒田非在鹹水沽建閘增挑引河  
導潮東灌不可欲大墾海河南岸荒田非由南運河上游建閘另  
開減河分溜刷鹵不可第士卒過勞工費過大非可剋期告竣現  
僅就兵力所及竭蹙經營先於鹹水沽新城一帶試辦仍俟辦有  
成效騰出軍力再籌挑南運減河由下節節而上漸求開拓期於  
畿東水利海疆防務兩有裨益除飭該鎮會同天津道妥細查勘  
次第興辦仍將一切未盡事宜隨時核議詳奪外所有防軍試墾  
鹹水沽一帶稻田情形除咨明總理各國事務衙門暨戶部知照  
外理合附片具陳伏乞

聖鑒訓示謹

奏

曾國藩請建省城專祠摺

光緒元年四月二十九日

奏爲已故督臣遺愛在民據情奏懇

恩准建立專祠崇祀名宦恭摺仰祈

聖鑒事竊據藩司孫觀臬司范梁清河道葉伯英會詳據保定府

紳士賀錫福等稟稱原任大學士兩江總督曾國藩自同治七年

調任直隸時值捻氛甫靖該督臣苦心經理澄敘官方禮賢清訟

選將練兵興舉水利賑卹災荒善政班班不可殫述前津郡稟請

建祠業蒙奏准省城爲首善之區士民愛戴尤深籲懇捐建專祠

春秋致祭並據直省紳耆進士王振綱翰林院庶吉士辛家彥等

公呈請將前督臣曾國藩崇祀省城名宦祠各等情請

奏前來臣查該故督臣調任畿輔兩年舉賢任能吏治爲之肅清

他如治河練兵次第籌辦皆有成效於地方利弊切實講求綱紀

漸立廢墜具修其在任時清理通省訟獄積案數萬件去任後籌助天河水災賑銀二十萬兩尤爲人所難能功德在民久而弗替既據合詞環請出於至誠相應據情籲懇

天恩准於保定省城由該紳士等捐建前督臣曾國藩專祠由地方官春秋致祭並准附祀省城名宦祠以順輿情而彰忠盡理合恭摺具

奏伏乞

皇太后

皇上聖鑒訓示謹

奏

督辦北洋海防謝摺

光緒元年五月初十日

奏爲欽奉

諭旨恭謝

天恩先陳大略仰祈

聖鑒事竊臣承准軍機大臣密寄光緒元年四月二十六日奉

上諭著派李鴻章督辦北洋海防事宜所有分洋分任練軍設局及招致海島華人諸議統歸該大臣等擇要籌辦等因欽此仰見朝廷力圖自強戒備不虞至意欽感曷任臣伏思今日中外交涉局勢爲千古所創見此閒海防籌辦機宜較他處而尤難凡事非財不行而北洋三省財力最窘別無可籌之款凡事非人不舉而非省文武洋務多生殊乏可用之材惟是

京畿門戶所係各國觀聽所屬若因循不辦終懼無以自立若切



實大辦祇愧力不從心臣謬任通商數年於茲外示羈縻每遇事  
變之來徒恃鎮靜內修備禦究其竭蹶之狀實倍尋常茲復渥荷  
恩綸畀以督辦海防重任微臣智術短淺才識庸愚雖略悉彼此  
強弱之形適當茲經費支絀之地旁皇無措展布何從惟有懷遵  
聖訓擇其最要者不動聲色先行試辦儘其力之所能及守其分  
之所當爲認真籌畫仍隨時隨事與總理衙門暨南洋督辦大臣  
沈葆楨會商切籌次第布置續行陳奏所有欽奉

諭旨恭謝

天恩先陳大略緣由理合繕摺具奏伏乞

皇太后

皇上聖鑒謹

奏

防邊各軍仍准給雜支片

光緒元年五月初十日

再直隸練軍餉章有應支柴草銀兩原爲體恤兵艱免致騷擾百姓經戶部覆核奏准歷年支銷有案上年部議忽令停支臣已分飭該營暫停片照例章核辦茲據宣化鎮總兵王可陞轉據統帶宣化練軍出防庫倫之游擊徐平川稟稱該軍與古北口練軍共馬步隊二千人自同治十年先後調赴庫倫防勦塞外寒苦無可樵采且蒙古地面各有愛曼管轄亦不能自辦柴草經庫倫辦事大臣飭將所領柴草銀兩盡數交給庫倫糧臺轉交愛曼代爲采買價值不敷復於每年十月起至次年四月底止由庫倫大臣每月加給該軍柴草銀二百兩交愛曼添辦應用經庫倫奏明有案該處一片沙漠氈房靡定村落毫無夏月僅產青草數寸秋季概成平地現在附近樹木伐售已盡須至三四百里以外始能覓購

搬運愈遠腳價愈多庫倫百物昂貴較內地加價至數倍或十數  
倍不等士卒甚形拮据今停發柴草銀兩卽無以供炊爨冬春風  
雪嚴寒更有手足皸瘃之苦目擊艱窘情狀委難停支仍請照常  
給領其古北口出防庫倫練軍同係窮邊戍守並請一律照辦等  
情前來臣查練軍官弁兵夫步隊全營五百數十人月僅支柴草  
銀百四十兩馬隊全營三百餘人月僅支銀八十兩本爲軍中所  
必需況塞外非內地可比額領之外尙須由庫倫加銀添辦據稟  
情形足見采購之難該兩軍遠役勞苦疊經勦賊著績若分內支  
項遽行裁減實不足以資飽騰應請將宣化古北出防庫倫練軍  
柴草銀兩仍照原奏定章接支至津郡練軍調赴奉天助勦本係  
行隊趨向無定該省勦匪喫緊正資客軍之力儻因樵薪細故騷  
擾閭閻或貽誤軍事所關殊非淺鮮應一併照章支給統俟撤回

再照本省各營辦理仰懇  
天恩俯賜允准以勵戎行而示體恤理合附片陳請伏乞  
聖鑒訓示謹  
奏

卷之三

Blank manuscript page with vertical lines.

張家口糧臺請部餉摺

光緒元年五月十七日

奏爲張家口糧臺懇

恩照案續撥部餉恭摺仰祈

聖鑒事竊查前因烏里雅蘇臺等處調兵防剿遵

旨在張家口設立糧臺辦理各路軍糧奏明請撥部餉以資接濟

計自同治九年十二月起至十三年止七次奏撥部餉銀二十一

萬兩飭委口北道分起辦運截至十三年年底止實存正款餘平

共銀二萬六百九十五兩零均經造報在案茲據署口北道博多

宏武稟稱駐紮庫倫之宣化古北口練軍應需米麩已運半年有

餘現仍陸續運發秋冬之糧駐紮烏里雅蘇臺之察哈爾吉林黑

龍江官兵應需口糧亦已辦運半年前存銀兩除已支外僅存銀

二千兩有奇不敷支用請速奏撥等情前來臣查該署道所稟委

委和二十五  
三  
係實情相應仰懇

天恩飭下戶部照案續撥餉銀三萬兩仍照章由該糧臺派員領解以濟要需所有張家口糧臺請照案  
敕撥部餉緣由理合恭摺具陳伏乞

皇太后

皇上聖鑒訓示謹

奏

籌濟奉省軍火片

光緒元年六月初六日

再臣欽奉四月二十六日

寄諭崇實奏請飭直隸籌撥軍火等語現在奉省操演洋鎗等隊  
急需軍火著李鴻章在天津機器局內迅速籌備等因欽此並准  
崇實咨商另行借撥鎗礮等項當飭局迅速籌備旋准派委協領  
德印等來津隨撥給洋鎗藥七千磅大銅帽八十萬粒上洋礮藥  
四千斤三寸五木信一千七百六十箇三寸九木信四百四十箇  
銅管門火四千枝三寸九炸子四百顆三寸五炸子一千六百顆  
二寸鐵子八百顆二寸二羣子八百箇鉛箭四十萬出鉛丸四十  
萬粒馬洋鎗三百桿步手鎗一百桿配發小銅帽五萬粒竹矛一  
百四十根十二磅開花礮六尊四輪礮車六輛照配三十六分二  
徑合膛開花子六百顆木信六百六十箇十二磅銅田雞礮四尊



矮鐵架四座合膛炸子四百顆木信四百四十箇並隨礮應用零  
件於五月二十九日點交德印等收領由海道運回尚有洋莊礮  
四尊俟架具造齊連隨礮子彈零件由便船搭運牛莊又先准神  
機營來咨都興阿請發洋藥五千磅鉛箭十萬出洋馬鎗鉛丸二  
萬粒銅帽三十萬粒小洋鐵對子開花礮需用三寸五分空心炸  
子三百粒

奏明由臣籌撥等因茲據該省委員訥欽來津並飭局如數給領  
另添撥炸子木信三百三十箇訥欽即於五月二十七日由陸路  
領解起程除分咨查照外理合附片陳明伏乞

聖鑒謹

奏

德國兵官請給寶星片

光緒元年六月初六日

再本年三月間德國駐京使臣巴蘭德來津接晤據稱該國距華較遠既無邊界毗連又無傳教及販賣洋藥等事可與中國永遠實心和好將來若欲派人赴泰西學習船政軍政他國縱有恪齋彼國必當盡心幫助並擬將該國現駐香港兵船調至大沽洋面請臣看操等語臣因其詞意極爲恭順當卽允行五月十九日據德國領事官璧斯瑪函報該國雅里阿特兵船奉調後於二十日可至大沽臣卽於二十一日率同津海關道黎兆棠及天津鎮道將弁馳赴大沽口外八十里洋面該總兵官操舟前迓船桅升挂中國龍旗放礮十九響迎送乃係西洋極隆重之禮臣親臨該船閱看操練其弁兵步伐整齊技藝嫻熟鎗礮器具均極精堅操畢卽面加獎勵賞給該船兵丁銀牌三百面臣仍於次日回津據黎

兆棠稟稱該總兵官副將等欲得

欽賜寶星以爲榮寵臣思外交之道與自強之謀相爲表裏德國

近年發奮爲雄實與英俄各邦並峙今仰慕

聖朝威德情殷效順自應相機聯絡予以體面藉事羈縻該船總  
兵官等職分較崇且不遠數千里而來專請閱操執禮甚恭殊堪

嘉尙臣仰體

朝廷柔遠之仁飭道仿製頭二等寶星各一枚由臣傳

旨賞給該總兵副將以示光寵而資觀感是否有當除咨總理各  
國事務衙門知照外謹附片具陳伏乞

聖鑒訓示謹

奏

祕魯換約摺

光緒元年六月十一日

奏爲祕魯使臣到津請將上年議定通商和約並查辦華工專條及時互換擬請

欽派大臣以便商辦恭摺仰祈

聖鑒事竊照祕魯國使臣葛爾西耶於同治十二年九月來津求立和約十三年三月間欽奉

諭旨派臣與之會商旋經臣與該使臣議定通商條約十九款並

訂明查辦華工專條於上年五月十三日公同畫押蓋印約內聲

明兩國

批准卽

特派大臣或在上海或在天津會晤互交當由臣奏明將原本進呈在案本年六月初六日祕魯使臣愛勒謨爾由日本到津函稱

現奉該國特派前來互換條約訂期謁晤臣卽於初七日接見初九日答拜告以前定和約及專條本應互換惟去歲七月間曾派管帶幼童出洋委員同知容閱赴該國密查月餘據其稟覆華工在祕魯各處山寮仍不免有陵虐之事須與商量辦法再將前次議定條約一併互換該使堅稱奉命來華專換已定之約不能另議他款若必另議須俟換約後妥商且前定查辦華工專條內已載明受苦華工由中國委員知照地方官傳案訊斷其合同期滿無力回國者由祕國備資送回各等語將來但有委員前往查辦祕魯必應照約辦理目前只求代爲具奏請

旨派定換約大臣以便迅速商辦旋於初十日該使復將該國批准和約及專條並派員來華互換上諭三件照譯底稿函送前來臣思條約已訂明或在天津互換臣又係原議之員未便壅於上

聞致失大信自應查照歷屆成案請

旨簡派大員就近在津與祕魯使臣將上年所立條約互換並商辦以後保護華工事宜仍請

敕下總理各國事務衙門知照內閣將祕魯漢洋字合訂條約及專條一分恭用

御寶迅速發交換約大臣祇領遵辦除將祕使鈔送該國上諭三件照鈔恭呈

御覽並咨總理衙門知照外所有祕魯條約據情懇請互換緣由謹繕摺馳陳伏乞

皇太后

皇上聖鑒訓示謹

奏



謹將祕魯使臣譯送該國上諭三件底稿照鈔恭呈

御覽

上諭五月十三日與中國所訂通商和約業於八月二十六日經選舉國會紳耆大臣公同議允朕自當照例批准收此和約卽行畫押布告本國一體遵照欽此

甲戌年九月初四日

大伯理璽天德畫押發出並有總理衙門大學士阿古耶勒畫押上諭五月十三日與中國所訂專條業於八月二十六日經選舉國會紳耆大臣公同議允朕自當照例批准收此專條卽行畫押布告本國一體遵照欽此

甲戌年九月初四日

大伯理璽天德畫押發出並有總理衙門大學士阿古耶勒畫押



上諭五月十三日本國與中國所訂通商和約現已議允自當派員前往互換今有愛勒謨爾公務練達又係前辦此事熟手因特派往駐劄中華並與以全權便宜行事與中國大臣換約諒能和衷相濟益敦睦好欽此

甲戌年十二月十七日

大伯理璽天德畫押發出並有總理衙門大學士阿古耶勒畫押

請派丁日昌商辦換約片

光緒元年六月十一日

再前江蘇撫臣丁日昌奉

旨來津商辦事務業於五月二十七日抵津臣與朝夕晤商該前撫傳述

陛辭之日仰蒙

兩宮

皇太后訓勵

微臣

各語曷勝感激涕零該前撫熟悉洋務操縱悉

合機宜此次祕魯換約雖屬照例之事惟訪聞華工在彼人數頗多受苦情形幾與古巴相等臣擬於前定查辦專條互換時再由換約大臣給予照會令將以前虐待華人各情弊嚴為禁革庶委員前往查辦較有依據丁日昌素為洋人所敬服若蒙特派該撫臣就近互換商辦似更得力是否有當附片具陳伏乞

聖鑒訓示謹

奏

周盛傳陳濟清互調片

光緒元年六月二十九日

再臣承准軍機大臣字寄光緒元年六月十二日奉

上諭劉長佑奏廣西現辦邊防右江鎮責任甚重請飭實任總兵  
迅卽赴任等語廣西右江鎮總兵周盛傳現在能否前赴本任著  
李鴻章體察情形據實具奏等因欽此遵查周盛傳自同治元年  
帶勇隨臣赴滬蘇剿賊嗣是轉戰南北無役不從功績卓著現統  
盛仁等軍馬步二十三營分紮津郡新城馬廠一帶籌辦海防拱  
衛

畿輔布置嚴整訓練精強足備緩急之用連年督率所部建築新  
城礮臺經辦開河屯田墾荒各工全賴該鎮籌畫調度一時難得  
替人體察情形實未便令其前赴本任惟據劉長佑奏稱廣西現  
辦邊防右江鎮責任甚重必須實任人員經理天津海防關係尤

為緊要周盛傳既不能履任員缺未可久懸竊查有天津鎮總兵  
陳濟清籍隸湖南由廣西軍營勦賊立功保升總兵於粵西情形  
素甚熟悉且本係劉長佑於直督任內奏調北來前經臣奏派統  
帶津郡練軍赴奉天助勦業將大東溝股匪殲除不日即可凱撤  
該員勇幹明練熟諳戎機擬懇

天恩將直隸天津鎮總兵陳濟清與廣西右江鎮總兵周盛傳互

相對調一轉移閒似人地各得其宜如蒙

俞允俟陳濟清帶隊回津後交卸營務再由臣檄令馳赴廣西新

任以期兼顧邊防臣為權衡緩急因地擇人起見是否有當據實

覆陳伏乞

聖鑒訓示謹附片具

奏

自省遞津添驛片

光緒元年六月二十九日

再天津靜海大城高陽等四縣向未設有驛站自同治九年督臣常駐津門並新設關道辦理通商事宜一切洋務海防往來文報駱驛刻不可緩而通省地方公牘多係自省遞津核辦該四縣已成驛路天津爲水陸交衝事更繁重必須添設驛馬乃可遞送無誤前據該縣等稟經飭司查得大道州縣額設驛馬六七十匹至百數十匹不等議將該縣等仿照大道州縣減半添設除原有遞馬外天津縣添馬五十匹馬夫二十五名靜海大城高陽等三縣各添馬三十匹馬夫十五名應需夫馬工料雜支各照例章核給以同治十年春季爲始按季在於司庫地糧項下撥領作正開銷其馬匹亦照例價由司撥款采買迄今察看情形原添夫馬可資周轉自應奏咨立案據藩臬兩司彙造清冊具詳前來除清冊分

委和二十三  
奏  
杏戶兵二部查照外伏乞

聖鑒俯准添設以重驛務謹附片具

祕魯換約事竣摺

光緒元年七月初八日

奏爲祕魯國換約事竣恭摺具陳仰祈

聖鑒事竊臣鴻章等於六月十四日奉

上諭著派丁日昌辦理祕魯國互換條約事宜欽此同日又奉

上諭華工在祕魯各處山寮受其陵虐必須妥議辦法李鴻章擬於前定查辦專條互換時再由換約大臣給與照會令將以前虐待華人各情弊嚴爲禁革之處卽著照所擬辦理等因欽此並由總理衙門發交蓋用

御寶條約二本前來當卽函知祕使愛勒謨爾該使旋於六月二十四日來謁臣日昌與之接晤告以祕魯華工現仍十分受虐必須於換約時加給照會聲明此後當除去從前一切苛待弊端俟覆文答應照辦方能換約該使始終狡執以現奉國主之命專辦



換約一事未經換約之前毫無事權不惟不能備文答應而且不能議論此事臣日昌仍與再三辯論該使怫然而去嗣各國領事密安士畢德格等亦復宛轉懇求願為擔保謂換約後愛使必有照覆但事前不能先看臣等仍以原議拒之迨七月初一日英國漢文正使梅輝立來謁談及此舉謂照萬國公法未換約之前使臣實無權可議論公事其袒護之意尤為顯然臣鴻章反覆開導梅輝立始允向愛使熟商如何辦法初三日梅輝立來晤並呈伊代擬祕使照覆稿雖有答應除弊之語而尙未結實臣等酌加增改數語強而後可卽經議定於初四日彼此換約梅輝立又求謂照會須作爲換約後口氣於愛使方無窒礙臣等亦復允之臣日昌於初四早前往答拜祕使愛勒謨爾英使威安瑪梅輝立等均在座因先索看祕使帶來條約有無錯誤威安瑪啟匣送閱

僅有英文日文二分條約專條裝潢華麗有其國主印押詢其何以無漢文條約等件威妥瑪等代答愛使在外國換約十數次均係如此辦理故漏未攜帶臣日昌告以中國總以漢文條約爲憑若漏帶此件卽彼此不能互換條約愛勒謨爾言漢文條約等件實存彼國惟求先將用

實之件彼此互換伊卽由電報通知該國數月內卽可將漢文條約專條送到然後彼此將存件補換等由囑威妥瑪梅輝立再三代爲情懇威妥瑪又云去年所立之約內有專條保護華工中國本佔便宜今愛使又許另立爲華工除去一切苛待弊端文件若肯通融先行換約十數萬華工不知沾光多少等語臣日昌仍復允許回寓後臣鴻章與臣日昌熟商以此次威妥瑪爲雲南之事氣骯張甚趁其有求於我稍爲轉圜未嘗不可稍示羈縻其所

言此舉於華工有益良亦不誣況從前義國換約情節與此正同  
自可援照辦理臣日昌亦以爲然當於次日約愛勒謨爾梅輝立  
晤商經臣等告以此次該使漏帶要件本難照辦因係威使等再  
三情懇始准通融茲將各用

御寶條約專條先行互換其餘洋文條約專條暫存天津海關道  
署候祕國將漢文條約專條送到卽由津海關道與該使補換中  
國不能再派換約大臣現在雖經互換約件然中國總以漢文爲  
憑俟祕國將原訂漢文條約專條送到再爲刊刻通行如能一一  
遵依用漢洋文寫在憑單內公同蓋印畫押方可將用

寶約件先行互換該使及梅輝立初有難色總求換約之後立刻  
卽要通行爭論良久而後定當於初七日互換用

寶之條約專條其祕國送來洋文條約專條責成梅輝立與繙譯

委員曾恆忠等詳細校對據云與中國所存洋文並無訛錯仍將此層列入憑單之內並將憑單執據及前議爲華工保護除弊照會及委員容閱所查口供見證一本並該使答應除去弊端照覆等件均於是日次第互換該使與梅輝立等言辭之間極爲恭順臣日昌因病甚先散臣鴻章照章稿以酒食該使等再三稱謝而去除現存洋文條約專條等件由臣等會銜札發津海關道收存以備祕使隨時補換仍在憑單內議明俟該使將原訂漢文條約專條送到後再由臣鴻章

奏明刊刷通行各省知照其此次添議爲華工保護除弊照會照覆等件亦一併刊刻於條約之後謹將添議照會照覆各稿繕呈御覽至前奉換約

諭旨謹卽封固繳回軍機處除將照會內鈔送容閱所查華工口

供見證一本及憑單約據等件分別咨呈軍機處總理衙門備查  
其換到洋字用印條約及奉發未用之副本另行派弁送交總理  
衙門查收辦理外所有祕國換約事竣緣由謹合詞由驛覆

奏伏乞

皇太后

皇上聖鑒謹

奏

謹將祕魯換約添議照會照覆各稿照繕清單恭呈

御覽

給祕魯使臣愛勒謨爾照會

爲照會事照得本日本大臣與貴大臣已將彼此現存條約並專條憑單等件互換案查前於十三年五月議約之後卽由本國派委員於七月間前往貴國查明華工情形旋據送到華民呈詞口供以及見證人所錄情形皆經指實華工所受委曲之處現在兩國業已立約志在永遠和好務望貴大臣行知貴國查照妥將以前苛待華工弊端盡行革除遵照專條及和約辦理嚴令將華工身家資財皆得保護以昭信守本國亦當或派欽差或派委員前往確查凡遇可以爲華工保護除弊之處隨時商同貴國全力襄助妥立章程以歸盡善並附去華工見證供詞

一本爲此照會貴大臣請煩照覆施行須至照會者

外附華工見證供詞一本

祕魯使臣愛勒謨爾照覆

爲照覆事照得今接貴大臣來文內開我兩國所立條約並專條  
兩件互換案查前於議約之後卽由本國派委員於七月間前往  
查明華工情形旋據送到華民呈詞口供以及見證人所錄情形  
皆經指實華工所受委曲之處現在兩國業已立約志在永遠和  
好務望貴大臣行知貴國查照等因前來查華民在於本國傭工  
者本國志在實力保護不容稍受委曲情事俟

貴國選派

欽差大臣前往本國商辦一切本國定必實力會商華工事宜以  
期爲華工盡除一切弊端使其皆得安居身家資財無不護全以

符條約及專條所定章程並昭信守現准貴大臣送來華工見證  
供詞一件本大臣自當譯出轉送回國查照辦理可也爲此照覆  
貴大臣請煩查照施行須至照覆者





請遣使赴祕魯片

光緒元年七月初八日

再查祕魯華工約有十餘萬人受雇王陵虐之慘實爲目不忍見耳不忍聞去年委員容閔曾與該國官員爭論滿工者亦卽放出八十人可知該國雖素無教化然我苟有使臣在彼執定條約與之斷斷相持則華工既有呼籲之門自可漸免欺陵之弊前與該國所立專條條約於保護華工一層本已剴切言之現在加立照會復將除弊各層明白指出但我若無使臣在彼則華工相隔七八萬里其保護與否除弊與否烏從而知之卽知之又烏從而拯援之乎合無仰懇

天恩迅派正使副使前往祕魯按照條約等件凡遇可以爲華工保護除弊之處隨時商同該國妥立章程是此日在水火十數萬之華人將死而得生旣危而復安也伏查華民在東西南洋各島

人數不下百萬春閒王大臣等議辦海防本有招致各島華人之  
議但平時既無相爲維繫之心則有事何以動其尊親之念今若  
於祕魯古巴各島分別遣使設官拯其危急從此海外華民皆知  
朝廷於絕島窮荒尙不忍一夫失所忠義之心不禁油然而動有  
裨大局誠非淺鮮臣等爲仰體

皇仁拯援難民起見是否有當謹合詞附片陳明伏乞

聖鑒訓示謹  
奏

嚴防誘拐華民片

光緒元年七月初八日

再祕魯各島臣等請分遣使臣所以保護既往之華人也而將往未往之華人尤不可不預早圖維致人陷阱查澳門等處向設有招工局卽俗名豬仔館愚民一人局中遂致長逝不返比聞澳門之大西洋官經英人責以大義業已停止招工然暗中招雇仍所不免其次如汕頭廈門及閩粵二省不通商口岸往往有夾板輪船私自前往販買人口現在祕魯條約內旣議明別有招致之法均非所准并澳門及各口不准誘騙一層地方官若能妥立善法當可潛杜奸謀合無仰懇

天恩飭下廣東福建督撫臣督同官紳按照條約妥擬杜弊章程奏明實力照辦務使內足以防誘拐之奸而外足以杜遠人之口至總稅務司及閩粵各口稅務司久悉誘拐確情於杜弊之法必

有確見真知可以兼收並采可否

飭總理衙門轉行總稅務司及閩粵各口稅務司一并妥議稽查  
拐騙之法呈覆采擇施行至該口稅務司如查有拐騙華民出洋  
約幾起以上人數約幾十以上似當酌加獎勵庶足以示鼓舞臣  
等爲防範未然起見是否有當伏乞

聖鑒訓示謹  
奏

淮軍西征報銷摺

光緒元年七月二十八日

奏爲淮軍調駐陝西等省軍需自同治十一年正月起截至是年十二月底止收支款目造冊報銷恭摺仰祈

聖鑒事竊照淮軍西征軍需前截至同治十年十二月底止業經列爲第一案報銷於十二年四月十一日具

奏旋經戶兵工各部核覆准銷並經戶部以例無柴草油燭折價名目駁令嗣後報銷須照定例章程辦理所有此項折價應卽刪除等因臣以同治十三年以前循案已經發過柴草油燭折價銀兩該弁勇等久經領用礙難紛紛追回致紊軍令請俟造報時仍照案核銷其自光緒元年正月起卽照例章核辦於本年二月十五日奉

旨著照所請戶部知道欽此其餘戶部行查各項亦均查明例案

分晰造冊登覆並另行開單附

奏各在案茲查淮軍除提督吳長慶統帶慶字親兵八營提督劉玉龍開花礮隊一營駐防江蘇仍循舊撥歸蘇省留防軍需案內彙銷此外調駐陝西直隸湖北等省軍需用款自同治十一年正月起至是年十二月底止列爲第二案所有馬步水師各營同提督曹克忠由津赴陝接統銘軍十年十月起添募營哨統歸此案彙銷以上營哨官弁員名勇夫總數征防處所先經造冊分咨軍機處戶兵二部備查至馬步水陸各營薪費口糧正雜等項概循前案仍照楚軍刊本營制並奏定章程及准銷成案接續造報其購買駝騾鞍架製造軍裝器械工價並提督曹克忠開差雇用船車騾頭夫工價腳悉照軍需例案並歷屆准銷成案核發其馬隊各營倒補馬匹係照駐紮省分營驛例價分別支銷轉運軍火餉

械雇用車輛駝騾夫役價腳等項按照斤重及程途里數例價核實給發均屬實用實銷飭將截至十一年十二月止收支細數趕緊分晰造報今據報銷局司道等詳稱舊管項上下屆截至同治十年十二月底止共銀四十九萬七千六百五十六兩一錢零新收項下綜計山東浙江四川等省協餉並提撥湖北江蘇藩關釐局軍餉兩淮鹽釐及本案扣存平餘同收回第一案兵部核刪駝夫獸醫工食等款共銀三百八十六萬九千一百四十二兩五錢有奇以上管收二項共銀四百三十六萬六千七百九十八兩六錢有奇內登除前副都統溫德勒克西卹賞銀一百九十二兩九錢有奇又附列專冊請銷補放淮軍陸勇水師各營同治十年底以前欠餉銀六十五萬五千二百三十三兩九錢有奇又本案附請專案



奏銷洋鎗礮隊教習辛工等項兩冊共銀一十四萬八千五百四  
兩三錢有奇實計收用銀三百五十六萬二千八百六十七兩三  
錢有奇開除正雜各款遵照部議酌定軍需報銷章程各歸各款  
核銷計應歸戶部核銷銀三百萬三千六百八十六兩有奇應歸  
兵部核銷銀九萬四千二十六兩九錢有奇應歸工部核銷銀十  
一萬一千二百一十七兩六錢有奇統共請銷銀三百二十萬八  
千九百三十兩六錢有奇實存銀三十五萬三千九百三十六兩  
七錢有奇已接支同治十二年分餉項歸於後案舊管項下滾接  
造報等情具詳請

奏前來臣伏查此次造報准軍馬步水師各營勇丁遵照部咨開  
報花名清冊正雜款項概發湘平折實庫平報銷仍扣雜款一分  
平餘均係循照歷辦成案實用實銷並無絲毫浮冒除將細冊分

咨各部並飭將以後用款趕緊接續清理造報外謹將淮軍調駐  
陝西等省軍需收支款目造冊報銷緣由專摺具  
奏並繕清單恭呈

御覽伏乞

皇太后

皇上聖鑒謹

奏



謹將同治十一年正月起截至是年十二月底止淮軍調駐  
陝西直隸等省軍需收支正雜各款繕具清單恭呈

御覽

計開

舊管

一上屆淮軍西征軍需報銷同治十年十二月底止實存銀四十  
九萬七千六百五十六兩一錢四分六釐九毫六絲二微五纖

新收

一收山東省協餉共撥解銀六萬兩

一收浙江省協餉共撥解銀十二萬兩

一收四川省協餉共撥解銀十四萬兩

一收湖北省軍需局共提撥沙平銀三十六萬兩合湘平銀三十五

萬九千七百四十八兩

一收湖北江漢關其提撥四成洋稅庫平銀二十四萬兩合湘平銀二十四萬八千二百五十六兩

一收湖北江漢關其提撥六成洋稅關平銀三十六萬兩合湘平銀三十六萬六千四十八兩

一收蘇州藩司庫其提撥銀二十四萬兩

一收江南海關其提撥銀六十萬兩

一收江蘇釐捐總局其提撥釐捐銀一百萬一千九百六十二釐九絲四忽

一收鄂岸鹽釐其提撥銀一十九萬一千四百三兩六分一釐五毫九絲八忽五微

一收湘岸鹽釐其提撥銀四萬五千六百兩

一收西岸鹽釐共提撥銀五十一萬二千四百三十五兩三錢四分四釐

一收皖岸鹽釐共提撥銀一萬七千六十一兩七錢二分

一收本案轉運價腳采買製造等項共扣存平餘銀一千四百二

十二兩一錢九分五釐二毫九絲四忽二微

一收回上屆淮軍西征軍需同治十年底止第九冊內請銷駝夫

獸醫工食奉刪追繳歸款共湘平銀一千三百一十四兩七錢四

分

以上管收二項共庫平銀三百四十二萬五千五百九十七

兩五錢二分九釐九毫四絲六忽九微五纖

湘平銀九十七萬五千三百六十六兩七錢四分折庫平銀

九十四萬一千二百一兩一錢三分八釐六毫六絲六忽四

微

共計庫平銀四百三十六萬六千七百九十八兩六錢六分

八釐六毫一絲三忽三微五纖

登除項下

一撥放記名都統前正黃旗漢軍副都統溫德勒克西病故卹賞

湘平銀二百兩折合庫平銀一百九十二兩九錢九分四釐三毫

七忽

一附列本案專冊請銷補放淮軍陸勇水師各營同治十年底以

前欠餉銀六十五萬五千二百三十三兩九錢三分二毫三絲三

忽

一附列本案第一冊請銷淮軍陸勇各營洋鎗礮隊教習通事工

匠人等辛工等項銀三萬二千八百八兩四錢二分五釐一毫六

絲五忽

一附列本案第二冊請銷製造西洋礮火各局工匠料物並購買外洋軍火價值等項銀一十一萬五千六百九十五兩九錢一分九釐六絲一忽

以上登除並附列請銷各款其庫平銀八十萬三千九百三十一兩二錢六分八釐七毫六絲六忽

實計收用庫平銀三百五十六萬二千八百六十七兩三錢九分九釐八毫四絲七忽三微五纖

開除

一第一冊請銷淮軍原募續添馬步各營統領營哨官弁勇夫薪糧等項內歸戶部核銷薪費口糧馬乾等銀二百六十三萬一千九百一十兩九錢六分一毫九絲二忽八微兵部核銷倒補馬價



銀九千八百五十六兩二錢一分九釐二毫四絲一忽

一第二冊請銷督標水師各營營哨官弁勇丁薪糧等項係歸戶

部核銷銀七萬五千一兩九錢一分六毫四絲四忽

一第三冊請銷隨營辦事支應各差京外文職官員薪糧等項係

歸戶部核銷銀三萬二百五十七兩六錢四分七釐三毫九絲九

忽

一第四冊請銷隨營先鋒差遣武職官弁薪糧等項係歸戶部核

銷銀三萬二千七十三兩二錢四分一釐三毫三絲九忽

一第五冊請銷武職大員在營借支養廉係歸戶部核銷銀九百

六十四兩九錢七分一釐五毫三絲三忽

一第六冊請銷淮軍馬步各營柴草油燭折價駝騾購車喂養車

輛雇價等項內歸戶部核銷柴草油燭折價駝騾購車喂養等銀

二十一萬六千一百五十九兩九錢九分二釐二毫八絲兵部核銷車輛雇價銀四萬六千九百四十五兩八錢六分五釐九絲七

忽

一第七冊請銷淮軍馬步水陸各營哨弁勇夫陣亡病故受傷卹賞係歸兵部核銷銀四千五百二十八兩六錢一分一釐四毫六

忽

一第八冊請銷購買馱騾價值並駝騾馬喂養夫工等項內歸戶部核銷購騾價值並駝騾馬喂養等銀一萬七千三百一十七兩三錢一分一釐五毫八絲九忽兵部核銷夫工銀三百七十六兩二錢八分一釐

一第九冊請銷各臺局所水陸轉運餉械並提督曹克忠由津赴陝開差雇備船隻車騾夫工價腳等項係歸兵部核銷銀三萬二

千三百一十九兩九錢九分三釐六毫三絲一忽

一第十冊請銷采辦物料製造軍裝器械工價並油艚船隻經費等項係歸工部核銷銀一十一萬一千二百一十七兩六錢八分六釐九毫二忽

以上第一冊至第十冊止共歸戶部核銷銀三百萬三千六百八十六兩三分四釐九毫七絲六忽八微兵部核銷銀九萬四千二十六兩九錢七分三毫七絲五忽工部核銷銀一十一萬一千二百一十七兩六錢八分六釐九毫二忽

統計十冊共請銷銀三百二十萬八千九百三十兩六錢九分二釐二毫五絲三忽八微

實在

存銀三十五萬二千九百三十六兩七錢七釐五毫九絲三忽五

微五織

查前項實存銀兩已接支同治十二年分餉項應歸後案舊管項下滾接造報理合登明

一同治十一年正月截至是年十二月底止其欠發淮軍陸勇各營餉銀二十七萬一千九百三十一兩六錢八分一釐九毫四絲二微

一同治十一年正月起截至是年十二月底止其欠發督標水師各營餉銀四千七百四十三兩八錢二分

以上其欠發餉銀二十七萬六千六百七十五兩五錢一釐九毫四絲二微續有補給銀款片歸後案專冊開報理合登

明



軍營交涉洋務銷冊片

光緒元年七月二十八日

再查淮軍陸勇各營洋鎗礮隊教習通事工匠人等辛工等項前截至同治十年底止業經另開清單附

奏准銷在案今自同治十一年正月起淮軍陸勇各營洋鎗礮隊教習通事工匠人等辛工行營製造洋礮局工料及購買外洋軍火等項均截至是年十二月底止金陵機器製造局用款截至十二年五月底止其請銷銀十四萬八千五百四兩三錢有奇茲據該司道等按款覆加查核均係奉文飭發並無浮冒另造細冊詳請附

奏請銷前來臣查前項淮軍陸勇各營洋鎗礮隊教習通事工匠人等辛工各款皆與洋人交涉無例可循仍應專案核實請銷除將細冊咨送總理衙門戶兵工部查覈外伏乞

奏  
聖鑒謹附片具

軍營柴草議價核發片

光緒元年七月二十八日

再查柴草油燭二項本爲軍營所必需准湘各軍歷經奏定酌予折價准銷在案上年十月二十九日戶部奏覆准軍西征報銷案內聲稱軍需例載官兵日給口糧并量給柴薪以資食用並無柴草油燭折價名目駁令嗣後報銷須查照定例章程辦理所有此項折價應卽刪除等因臣以同治十三年以前遵照奏案已經發過折價銀兩該弁勇等久經領用礙難紛紛追回致紊軍令請俟造報時仍照案核銷其自光緒元年正月起另照例章核辦奏奉諭旨允准一面分飭各營局妥議去後茲據先後稟覆遵將油燭一項停支由營官暫於公費內購用其柴草日需炊爨樵采易致騷擾定例雖無折價名目有量給柴薪明文請照例核發前來臣查例載官兵每名量給柴薪以資食用又註云原擬兵丁供應口



糧准銷今酌擬加給柴薪亦准報銷各等語所有淮軍各營支領柴薪一項自光緒元年以後應遵部咨查照例章核辦惟例內並未明定每名應支斤重數目淮軍調紮直隸山東江蘇臺灣等處沿海設防就地采買木柴稻草豆麥秫稻不等各處時地情形不同市價斷難畫一必須酌定斤重及價值數目方符量給例意今擬每名日給本色三斤由各營隨地購辦不論柴草名目每斤照市價通牽合錢三文合銀一釐八毫如此定出本色斤數一律價值皆照向章格外覈減不能再有短少擬請卽按此數核發以示限制庶行軍不致掣肘造報不致紛歧經費節省亦較多矣合無仰懇

天恩飭部查照立案以恤兵艱理合附片具陳伏乞

聖鑒訓示謹

奏

奏

奏



西征扣曠片

光緒元年七月二十八日

再准軍西征軍需自同治九年四月起至十年十二月底止造冊報銷一案經戶部分別准駁行查續准將柴草油燭折價官役騎騾腳力晉省代辦糧價核覆准銷在案所有行查病故馬步兵勇隨時挑補並無空曠一節緣准軍統領營官向有隨帶餘勇於所支公費內酌給口食遇有勇丁病故等事卽於此項餘勇內隨時挑補如陝防銘字等營告假汰弱勇丁爲數較多除餘勇挑補外仍有空額亦已聲明扣曠核實造報有案此外行查各款計共銀四十萬二百七十五兩有零經臣飭據報銷局司道逐一查核例章與准銷成案按款分晰聲敘彙開登覆清冊咨送戶部核銷去後茲准部咨此案係奏明行查俟奏報到日再行按冊核辦等因理合查照登覆原冊繕具簡明清單恭呈



謹將淮軍西征軍需自同治九年四月起至十年十二月止  
報銷案內戶部行查各款繕具簡明清單恭呈

御覽

計開

一部查銘字與武毅軍馬隊哨官哨長什長親兵馬勇支食薪糧  
未照楚軍營制一律開支又督隊獸醫兩項與楚章不符等因遵  
查前項各款係照銘軍初立馬隊章程核准開支此次西征仍遵  
歷屆准銷成案接筭支給並無兩歧計原造請銷銀六萬七千八  
百三十兩二分

一部查勳字後營幫帶官營務處哨官護衛鎗隊教習支食薪糧  
公費照何例章支給等因遵查勳字後營內開花礮隊從前本係  
派員管帶月支薪費銀八十兩嗣裁留一哨仍令總兵彭勝彪作

爲幫帶減給薪費銀五十四兩又教習口糧銀數係仿照教練營章程酌定支給歷屆准銷在案至營務處哨官一員因所帶勇夫共一百八十八名酌定支給薪費按楚章一營五哨之制科算有減無浮計原造請銷銀二千一百八十七兩二錢

一部查總理盛仁武毅銘字馬步全軍營務處並管理駝騾廠務各員月支薪糧公費差遣先鋒及隨營護運糧餉軍械員弁薪糧多寡不等並未照例分晰開列等因遵查前項文武各員弁應支薪糧均係循照剿捻軍需准銷成案按差事之繁簡定薪糧之多寡分別支給若照應支分例細數統計比算節省較多其公費一項營務處暨駝騾廠馬步勇夫六百五十四人置辦旗幟號褂並喂養駝騾需用各項器具及匠役書識工食等項皆從公費內支給並不另行開銷前於剿捻軍需尾案造報准銷在案此次酌定

循案支給計原造請銷銀三萬二千八百一兩八錢

一部查隨營辦事支應轉運並先鋒差遣文武員弁支過薪糧夫價照何例案等因遵查湘軍第五案並勦捻軍需各案內疊經

奏明不論官階大小均按差使繁簡定支銀多寡量時地以爲增減歷經報部准銷有案此次仍按差使繁簡支給若照軍需例案比計非但無浮實係節省較多計原造請銷文職薪糧等項銀七萬九百二十一兩四錢又武職薪糧等項銀五萬六千五百六十八兩六錢

一部查周盛傳借廉銀五千兩唐仁廉借廉銀三千兩均係借支何年廉銀等因遵查廣西右江鎮總兵周盛傳自同治六年六月初四日在營接劄日起至十一年三月底止貴州安義鎮總兵唐仁廉自同治六年十二月初十日在營接劄日起至九年三月底



止各支本任勻閏全廉業經分咨廣西貴州各原省飭司扣給毋庸解還計原造共請銷銀八千兩

一部查淮軍西征馬步各營支領車騾喂養一項應令聲明每車騾頭數目等因遵查馬隊刊章每哨給車一輛購車每輛不論套數月支喂養銀十四兩業於剿捻軍需各案造報准銷今均循案支給至駝騾喂養一項臣於同治十年五月

奏定每營月給駝騾喂養銀一百兩凡一營六哨者月支銀一百五十兩經部行文遵照在案即照酌定支數按月給予喂養計原造請銷銀九萬三千一百六十四兩

一部查采買駱駝價值解駝官弁牧丁回旗路費因何不符至駝騾馬匹日支喂養及解駝官弁牧丁人等守候薪糧係照何章支給等因遵查勦捻時需用駱駝係在口外出產地方采買其價稍

廉西征時因軍務緊急飭在內地采買價值稍昂先後時地不同  
價值不一要皆核實造報又勦捻軍需初案內察哈爾撥馬一千  
匹解馬官兵先後共給回旗路費銀四百八十兩今察哈爾西林  
果勒捐駱駝一千匹解駝官兵牧丁人等共給回旗路費銀三百  
二十四兩均按人數多寡支給核與前案有減無浮至頭起解駝  
官弁牧丁人等在營守候支給薪糧實以遠道來營暫留照料喂  
養按日酌給薪糧錢文以資口食並無定章其駝騾馬匹喂養並  
駝騾廠日需草料係照蘇滬軍需案內馬乾准銷成案無分駝騾  
馬匹每隻日給銀一錢卽令經管員弁自購草料喂養以示限制  
計原造請銷銀八萬三千三百三十二兩九錢二分八釐六毫  
以上部查各款原造共請銷折實庫平銀四十萬二百七十  
五兩九錢三分二釐二毫五絲九忽均係查照例章准銷成

案分別核實支給並無浮冒業經按款分晰聲敘彙開登覆  
清冊咨送戶部核銷在案合並聲明

李文忠公奏稿

卷之二十六目錄

會商滇案摺

光緒元年八月初六日

請飭薛煥幫辦滇案片

光緒元年八月初六日

恭辦

山陵大差摺

光緒元年八月二十二日

繳還

諭旨片

光緒元年八月二十二日

絲布仍復舊制片

光緒元年八月二十二日

疏濬文霸各河請獎摺

光緒元年八月二十二日

張家口兵米請給全銀摺

光緒元年九月初一日

上海機器局報銷摺

光緒元年十月十九日

成船用款片

光緒元年十月十九日

大差應蠲租糧分別核辦摺

光緒元年十一月初三日

賑撫收支實數摺

光緒元年十一月初三日  
附清單

湖白河工程請獎摺

光緒元年十一月初三日  
附清單

津郡新城竣工摺

光緒元年十二月十八日

新城工程請獎片

光緒元年十二月十八日

近省續辦隄河各工摺

光緒元年十二月十八日  
附清單

營員請給封典片

光緒元年十二月十八日

李文忠公奏稿卷二十六

全集一之二十六

桐城吳汝綸編錄

會商滇案摺

光緒元年八月初六日

奏爲遵

旨與英國使臣威妥瑪會商據情籲懇

聖恩將前派出使英國及責問岑毓英等

諭旨酌量明發以釋其疑恭摺仰祈

聖鑒事竊七月二十九日午刻接奉二十八日

寄諭英國馬嘉理一案威妥瑪在津與李鴻章疊次晤面已有旨

派李鴻章丁日昌將此案與之商議該督等當悉心籌畫妥商定

議以顧大局等因欽此伏查英使威妥瑪自七月初二日由滬到

津與臣三次往復晤談旋遞交辦理滇案洋文節略當經先後詳

細函達總理衙門酌辦在案惟該使所要各條雖欲件件辦到而於

諭旨發鈔一節爭之尤力該使本有即日回京之說適於二十九日申刻來臣署辭行當告以業經奉

旨派郭嵩燾等出使英國該使似尙愜意惟以有無發鈔爲詞仍欲進京商議臣等遂將另奉

諭旨一道恭錄給與閱看留伊會商該使謂辦理外國交涉須專視總理衙門爲定準若將應辦事宜先與面論自無不可因訂於三十日辰刻會議復將前遞節略七條逐層辨論並索看責問岑毓英等

諭旨臣等又將所奉

寄諭敬謹節錄給閱與總理衙門隨後寄到照會該使底稿略同

仍告以已有

廷寄通行各省督撫自必中外皆知可無疑慮該使總謂不肯發鈔爲輕視該國並非真心和好之證據專爲發鈔二字辨爭兩時之久且云若不發鈔

諭旨亦同虛文餘事可勿庸議臣等既奉

旨會商未便任其決裂且查同治九年法國天津一案曾有明發諭旨該使必挾此意以固求當允據情代爲奏請但可否發鈔仍非臣下所敢擅擬旋於八月初一二等日函商總理衙門去後威妥瑪忽於三十日申刻坐兵船開往煙臺初五日與該國水師提督賴德回津專行知會謂該使現有微疾不克會晤旋據函稱已調梅輝立日內到津該使擬仍赴京意頗怏怏想因梅輝立向總理衙門商請發鈔未蒙允准又有不願在津商辦之意臣等竊思



馬嘉理一案已逾半年迄無頭緒該使與其朝廷催辦緊急固在情理之中且疑中國上下不肯實心和好致有此等巨案臣等疊經開導我

朝廷及內外各大臣絕無他意該使總不見信其所要求各件若有礙

國體者雖絕交亦不可允若有關外交無傷

國體者似權宜尙可允行如

簡派使臣一節總理衙門照會各國雖將大英國臺寫而明發

諭旨專以曉諭中國臣民自可不必臺寫卽發鈔後該使或有挑剔必當據理剖辨無庸先與商明抑或變通字樣另擬

諭旨發鈔以前派出使英國大臣郭嵩燾作爲正使許鈴身作爲副使似官階亦復相稱至前奉

寄諭責問岑毓英等辦理遲延雖向無明發之例而

朝廷既經實意催辦似無妨宣布中外以示大公而服遠人此案  
誦本在我值此時勢艱難不得不相機駕馭昨准總理衙門函稱  
已告知梅輝立或由臣等設法奏請亦可茲觀威妥瑪意甚決絕  
卽再堅拒必卽赴京爭鬧勢更難於轉圜可否仰懇

天恩將前次

諭旨二道酌量明發俾彼可釋疑而我亦不至失體如蒙

俞允該使無論在津赴京商辦他事當較順手似於大局有裨是  
否有當謹會同前江蘇巡撫臣丁日昌合詞繕摺由驛五百里具  
陳伏乞

皇太后

皇上聖鑒訓示謹

奏

請飭薛煥幫辦滇案片

光緒元年八月初六日

再臣前聞滇邊馬嘉理一案牽涉職官在內英人耳目甚多心計最狡深恐不易辦結曾與臣兄李瀚章緘商以頭品頂戴前任工部侍郎薛煥籍隸四川敘州府與滇接壤現正養病家居該侍郎曩在江蘇藩臬任內值咸豐八年英法議約躬親其事存升蘇撫旋署江督皆兼通商大臣嗣後在總理衙門任事多年洋務最爲熟悉於輕重緩急機宜歷練已久控馭有方請其奏調前往商辦昨接李瀚章覆函深以爲然謂俟抵滇後再行酌辦頃接總理衙門鈔寄威妥瑪照會滇案詳細情節節支離關係極爲重大事勢尤爲緊迫況以後邊界貿易恐難堅拒英旣得閒而入法必援例而來須有明練條約章程者相機察度籌議爲日正長要在大吏得人隨時設法補救可否請

旨敕下前侍郎薛煥就近赴滇幫同李瀚章商辦一切當更得力  
查天津前案經曾國藩丁日昌及臣等數人竭歷經營幸而蕝事  
滇案視津案後患更多距京極遠非資助於羣策羣力恐邊事未  
易就緒臣於同治初元蘇撫任內與薛煥其事年餘深知其人老  
練可靠今爲滇案緊要就地擇人起見是否有當謹附片據實密  
陳伏乞

聖明采擇謹  
奏

恭辦

山陵大差摺

光緒元年八月二十二日

奏爲恭報奉辦

山陵大差事宜並

微臣

定期起程仰祈

聖鑒事恭照本年九月十八日

皇上恭奉

慈安端裕康慶皇太后

慈禧端佑康頤皇太后躬送

穆宗毅皇帝

孝哲毅皇后梓宮奉移

山陵所有沿途

蘆殿地盤及經由道路橋梁尖營基址及此外各項事宜均已飭知司道分行各該地方官並遴委熟悉差務之員敬謹備辦昨據

委員隨同嚮導處勘定地盤橋道惟通州地面有因水窪略須改道之處當飭承辦各官遵照卽日興工前准軍機大臣字寄醇親王奏請變通修道辦法欽奉

懿旨著酌度情形妥籌辦理現當禾稼未盡收穫仍著徧行曉諭嚴飭地方官不得任意侵佔田疇藉端苛派等因卽經籌度嚴飭欽遵並出示徧行曉諭又疊次欽奉

上諭無庸另備御道及不准格外苛派擾累仰見我

皇太后

皇上軫念民艱優加體恤至意欽感同深現照道光三十年成案將

梓宮道修寬三丈外加一丈四尺較之另備

御道丈尺減少而行走亦可展舒已令照式認真修墊務須堅平

乾潔不必積土太厚其各項差事向應借資民力者按照舊章斟酌時宜核實分派儻敢藉端格外苛累分別嚴參重辦並飭藩司孫觀於八月二十一日先行出省認真稽查督催期臻妥速臣擬俟洋務料理粗畢即於九月初二日起程順道入都趨叩

闕廷跪聆

聖訓再行出京查看布置一切敬謹隨扈伏候

諭旨祇遵至藩司出省後臣省署日行公事已委臬司范梁代印代行其緊要事件仍封送臣行次核辦理合恭摺具陳伏乞

皇太后

皇上聖鑒謹

奏



Blank page with vertical lines.

繳還

諭旨片

光緒元年八月二十二日

再臣等於八月初六日曾將英國使臣威妥瑪在津商辦各節並該使擬仍赴京緣由專摺馳

奏在案初七初八初九等日臣等復與威妥瑪梅輝立往來接晤仍堅持初議未敢遽有鬆勁該使執意進京婉留不可遂於初九日下午登舟北行臣等甫奉到初八日

寄諭派員出使已明降諭旨應如何照會該使著妥爲辦理等因欽此該使業經起程自可不必照會當經函請總理衙門王大臣妥爲籌議所有臣等前奉

諭旨一道應仍繳還軍機處備查謹會同前江蘇巡撫臣丁日昌附片陳明伏乞

聖鑒謹

奏

奏

奏

奏

奏

奏

奏

奏

奏

奏

奏

奏

十

絲布仍復舊制片

光緒元年八月二十二日

再准戶部咨緞疋庫奏催直隸省辦解絲麻布疋等款當經行司  
籌辦茲據藩司孫觀詳稱絲麻布疋向係蘇浙等省辦解同治三  
年部議杭州地方未靖蘇郡甫經收復奏改直省籌辦應用聲明  
俟江南等省克復仍照向章由各該省辦解等因原屬一時通融  
之舉並非沿以爲例迄今十年之久直省已屢次竭力籌辦但本  
地並無出產必須遠赴山東等處設法零星勻湊往往遷延時日  
近因該處銷路不暢貨益短少價益昂貴而委員往來復增費用  
殊不合算況直省本係缺額之區加以災欠頻仍糧賦蠲緩連年

恭辦

陵差司庫支絀實無可籌之款江浙肅清既久蠶織繁茂貨物已  
充采辦甚易價值較省請復舊制等情具詳前來臣查此項常年

需用絲麻布疋已於同治十二年九月開奏請歸各該省辦解奉  
硃批著照所請欽遵在案今戶部復令直省采辦惟地非出產事  
非向章且值經費竭蹶之際無從另籌巨款自應復歸舊制仍由  
蘇浙等省絲布豐收地方分飭辦解以免貽誤謹遵前奉

批旨仰懇

天恩俯准敕部仍照同治三年原議辦理合附片具陳伏乞

聖鑒訓示謹

奏

疏濬文霸各河請獎摺

光緒元年八月二十二日

奏爲勸捐挑濬文安等縣勝芳河道疏通霸保上游各河尾閘現已工竣並將尤爲出力員紳請獎恭摺仰祈

聖鑒事竊臣前將霸州文安境內中亭河籌款派員挑濬俾南減霸保等處大清河之水上瀉蘆僧河旁洩牝牛河之水並修築隄埝以衛田廬各該境已獲隄河之益惟下游文安勝芳村東南一帶本係淀泊巨浸水勢寬緩盛漲未能直捷歸墟沿淀村莊頻遭災患因查勝芳之東齊家河頭起經大城縣霸州至靜海縣之楊芬港有舊河一道本爲通津達海要區久已淤成平地當飭原挑中亭河之委員候選知府史克寬與文安縣知縣丁符九督同紳董勘籌辦法惟需費甚鉅無款可籌經該員等勸據紳商均願集資興作以工代賑計舊河長四十里裁灣取直合長五千二百餘

丈定為首尾挑口寬十一丈其餘口寬七丈底寬三丈四尺至三丈八尺河頭地勢高仰挑深一丈二三尺愈下則愈低逐段減至五尺又於沿河北岸五丈外築隄一道高八九尺頂寬一丈七八尺腳寬六丈餘又自齊家河頭上接至崔莊中亭河節節築隄以免中間空缺並將中亭河隄一律加高培厚又因下口楊芬港東即係鳳河恐溜大倒灌復築土埝二千餘丈用資攔護一面妥定工務捐款章程工由印委督率款歸紳董收放遂於四月初開辦至七月初一律告竣其實用捐項銀二萬四千五百七十四兩有奇文大霸保窮黎皆得傭工趁食惟切近淀泊施工極難又值夏雨時行戽水撈挖彌形艱苦六月二十八日上游龍門舊隄忽被大溜衝決該員紳等冒險率夫趕緊搶堵旋即閉溜使前項工程不致停廢附近村莊不致成災辦理殊為妥速飭據候補知府徐

本衙前往逐一驗收丈尺悉與原報符合上游各河漲水均歸該河滔滔東注甚形暢利隄埝亦均完固統計隄北文安大城霸州永清百數十里內田廬皆得保全而隄南諸淀因有新河迅速宣洩凡葦灘蒲港荷泊稻畦向沒於波濤中者亦多出水小民可資生業且有此北隄若永定河渾水漫至須停頓而後澄清東下藉免東淀淤阻尤於農田水利大局有裨現飭籌議修守章程隨時實力奉行務期經久不廢除捐資紳商照案歸入賑捐項下核明彙獎外所有尤爲出力之官紳四人認真籌勸督率克成要工復冒險搶堵決口不無微勞足錄候選知府史克寬本係督挑中亭河出力應獎之員擬請將該員俟得缺後以道員用文安縣知縣丁符九請以直隸州知州在任卽補都司銜王鶴鳴請加游擊銜同知銜王璞請加四品銜仰懇



天恩俯准給獎以示鼓勵至此項工程係屬民捐民辦卽以賑濟窮黎應免造報合併聲明理合恭摺具陳伏乞

皇太后

皇上聖鑒訓示謹

奏

張家口兵米請給全銀摺

光緒元年九月初一日

奏爲張家口駐防兵米價腳請照例定數目發給全銀以濟兵食  
恭摺仰祈

聖鑒事竊據口北道玉珩詳稱張家口駐防兵丁每歲應需本色  
米一萬二千五百餘石遇閏加增一千餘石每米一石例給價銀  
一兩運腳銀二錢五分向派保安宣化萬全懷安張家口等五州  
縣廳分領采買運交廳倉支放從前價腳均發實銀且米價平減  
采買較易歷係按時支放自咸豐四年行用鈔票僅發一半實銀  
該州縣廳無力賠累遂致連年積欠同治四年前督臣劉長佑奏  
准每米一石給價實銀七錢核計不敷尙多仍難采買復經前署  
察哈爾都統裕瑞等奏准部議將同治五年以前欠米暫放折色  
以後仍放本色頻年疊飭該州縣廳勉力采辦但時價每石需實

銀一兩六七錢僅發七錢連運腳在內甫能及半計每年應賠銀一萬兩有奇實屬無從籌補該州縣廳各有應辦差務加以運送西路軍營餉械絡繹於道已屬賠墊不支又何能每年再添鉅萬之累至兵丁賴此養生原領米數本未足用若再拖欠或折給半價卽無以餬口飢困堪虞查同治七年停用鈔票以後凡係實用之款均已改放十成實銀駐防兵精緊要熱河密雲山海關等處米折已有改歸十成之案張家口事同一律未便如前折扣請自光緒元年春季起每米一石連運腳仍照舊例發實銀一兩二錢五分並仍由山西豐鎮廳徵收牧地租銀內按年照數解交口北道庫兌收飭領如此辦理雖尙不敷時價而賠累減輕自不致再有延欠兵丁卽免枵腹等情並准察哈爾都統慶春等亦以前情咨請會奏以恤兵艱等因前來臣查直隸州縣瘠苦往往因公虧

挪庫款現正通飭清理交代減緩捐攤以杜虧空此項兵米例價已少於時價又復從中折扣不敷采辦州縣無力攤賠非挪動錢糧卽連年積欠流弊滋甚況張家口地方寒苦駐防兵丁惟資額米養生慶春等與該道請將采買兵米價腳仍復舊制發給全銀係爲籌濟兵食核實起見仰懇

天恩敕部議覆施行理合會同察哈爾都統臣慶春署副都統臣奎昌恭摺具陳伏乞

皇太后

皇上聖鑒訓示謹

奏



上海機器局報銷摺

光緒元年十月十九日

奏爲滬局創設機器歷年動支經費各款撥案開具簡明清單恭摺仰祈

聖鑒事竊自同治初年臣鴻章孤軍入滬進規蘇浙輒以湘淮紀律參用西洋火器利賴頗多念購器甚難得其用而昧其體終屬挾持無具因就軍需節省項下籌辦機器選雇員匠仿造前膛兵鎗開花銅礮之屬上海之有製造局自此始其地爲各國官商薈萃之場其人皆有炫奇鬪巧之智一名一藝奔湊爭先孰楛孰良見聞較捷取彼之長益我之短自強之基莫大於是六年曾國藩奏辦輪船請撥江海關洋稅一成八年馬新貽丁日昌續請添撥一成而後局用有常款踵事無止境先後承辦道員沈保靖馮燦光知府鄭藻如等類能苦心探索引伸觸類拓取法之門徑守核

實之常經臣等事事加意督察固無日不責其成效不惜費亦不任浪費也茲據馮煥光等詳稱頻年用款漸巨積贖亟應清釐計自同治六年五月動支洋稅之日起截至十二年十二月底止共收江海關二成銀二百八十八萬四千四百九十七兩九錢八分九釐四毫其用購器製造建廠薪工等項銀二百二十三萬六千二百二十四兩六錢八分九釐一毫實存料物等項銀六十四萬八千二百七十三兩三錢三毫請歸入下次舊管列報所有開除各款俱係慎重擲節惟事屬初始經緯萬端料物取給外洋則昂一器講求數樣則昂匠價優於常例則昂種種淆異悉費權宜固不敢狃於故常亦不敢絲毫浮冒等因具詳請奏前來臣等公同覆核該局製造大端有五而纖悉零崎之事不計焉一曰輪船開造之始精擇程式詳繪表裏成算既定將船殼鍋爐氣機分為三

門以洋匠三人領工華人數百且助且學經年累月始得入水配  
用已造成者爲惠吉操江測海威靖海安木兵船五號海安丈尺  
加廣實馬力千八百匹巨礮二十兵丁五百在外國爲二等在內  
地爲巨擘又成鐵殼小輪船三號其造而未成者爲海安同式之  
第六號兵船夾板商船小鐵甲兵船自今海上要需無如鐵甲自  
當因勢利導速求進益冀日起而有功以補購致之不足一曰鎗  
礮向曾造英法美兵鎗馬鎗數種今則改造後門鎗專主林明敦  
底鍼中鍼鐵管鋼管之式別有所謂馬梯泥土乃得者法明而器  
猶未備向曾造生鐵輕銅田雞礮多尊今則議改烏理治鋼膛鐵  
箍前門炸彈之式別有所謂克鹿卜回特活得者用宏而力有難  
兼禦侮之道礮甚於鎗縱不能如島族絕大窮凶之制尙當勉圖  
精利取攜自如庶幾船臺不等虛設一曰火藥彈子年來購買及



自製鎗礮何止數千百具要皆不耐土藥不受劣彈若非及時配  
辦並分別前膛後膛大小長短之度臨事何所設施利器直同廢  
物該局又在局西十里之龍華地方分廠治具如法開造約計每  
日出藥千磅出林明敦彈子五千顆就中試用化學兼造白火藥  
及各種錘水均有成就所造礮彈月計不足歲計有餘此物貴多  
貴精未敢稍涉大意蓄艾之方得寸則寸也至如製器建廠一事  
器體互異名色綦繁而統謂之機器造船造鎗礮造火藥彈子是  
爲機器大宗此外鎔銅鍊鐵鋸木挖泥抽水打樁起重印書印圖  
等事亦皆機器爲之入手以重價購自外洋迨至隨事遞增或仿  
舊式或出新裁或攷圖說往往由局自造工料亦復浩繁增機器  
必增廠屋以資會歸綜前後營造計之局以內工藝正副各廠及  
庫房畫圖房方言館公務廳共十七座局以外船礮藥彈各廠及

洋樓與圖局共十五座大船塢一區皆係價買民地經營近十年而後規模粗具締造之難有如此又如緡譯課士一事西法兼博大潛奧之理苦於語言文字不同將欲因端竟委窮流溯源舍緡書讀書無善策該局陸續訪購西書數十種厚聘西士選派局員相與口述筆譯最要爲算學化學氣機火藥礮法等編固屬關繫製造卽如行船防海練軍采煤開礦之類亦皆有裨實用現譯出四十餘種刊印二十四種藉是稍窺要領牖啟高明又挑選生徒數十人住居廣方言館資以膏火中西並課一抉其祕一學其學製造本原殆不出此此其局務大略聊可舉數者也臣等考其歲入之數至多不過四十萬而一隅兼數局之任一曰倍千人之供尙能規畫咸宜成造之件應付數省精緻適用自開局以來凡例所本無用所必有率皆稟承臣等斟酌定議此次總覈放款委係

實用實銷毫無浮混但名目繁瑣剖晰勞如難以循例造報理合  
援照天津成案彙繕簡明清單恭呈

御覽仰懇

天恩逾格准予開銷以清款目而策後效除分咨總理各國事務  
衙門戶部工部查照外所有上海機器局自同治六年五月起截  
至十二年十二月底止動支經費各緣由謹合詞恭摺具陳伏乞  
皇太后

皇上聖鑒訓示再滬局創設之後初次報銷此摺係臣鴻章主稿  
合併聲明謹

奏

成船用款片

光緒元年十月十九日

再查工部奏定各省購買輪船未能逐款造報應由各督撫專摺奏銷報部存查一案原摺內稱安徽籌辦江防由外洋購買輪船二隻既無例案可循應令專摺奏銷並將船身丈尺工料價值需用機器等項開單咨部存案嗣後各省均令遵照辦理等因奉

旨依議欽此欽遵行知在案滬局各船雖係自造而大宗料物無非購自外洋製造工作亦係洋匠主持與購買外洋船隻略同所有陸續成船修船行船各種工料及未移交操練局以前支發薪糧等費仍應分晰開報以昭核實而符成案茲據馮煥光等具詳前情除支用總數已列入四柱清單奏報外謹將每船用款臚列一單附片具陳恭呈

御覽謹



大差應蠲租糧分別核辦摺

光緒元年十一月初三日

奏爲

山陵大差奉蠲沿途州縣糧租遵化州並非經由地面照案應行  
剔除並將應蠲糧租照例分別核辦恭摺仰祈

聖鑒事恭照本年九月間

穆宗毅皇帝

孝哲毅皇后梓宮奉移

山陵欽奉

上諭著將沿途經過之大興通州三河薊州地方本年地丁錢糧  
蠲免十分之五遵化州蠲免十分之七所有由京至遵化州一帶  
經過地方除隙地不計外凡有平毀麥田者著加恩每畝賞給銀  
一錢俾農民購買籽種藉資補助又續奉

上諭大興通州三河薊州遵化五州縣蠲贖本年錢糧著再加恩全行蠲免尙有應徵本年各項旗租併著一體蠲免各等因欽此均經行飭欽遵迅速曉諭認真辦理茲據布政使孫觀詳稱從前奉蠲此項糧租係將經過州縣查報請蠲恭查同治元年九月

文宗顯皇帝

孝德顯皇后梓宮奉移

山陵欽奉

恩旨蠲免遵化等州縣錢糧因遵化州並非經過地面經前督臣奏奉

上諭遵化州地面既未經由與民田無礙卽著無庸蠲免以示區別等因欽遵在案此次沿途經過地方係大興通州三河薊州四州縣遵化州僅在薊州借地辦差並不經過該州境界與同治元

年事同一律所有遵化州應徵本年錢糧旗租自應照案剔除無庸蠲免該州亦無平毀麥苗地畝並無庸賞給籽種銀兩以示區別等情具詳前來臣覆核無異相應奏明請

旨遵行至定例蠲免錢糧應按

御道兩旁地畝丈算山岸河坎窄狹處所以二里爲限平原曠野以三里爲限道光三十年

西陵大差同治元年

東陵大差均經戶部核覆應以二三里界內請蠲此次大興等州縣蠲免錢糧似應遵照例案仍以二三里爲限又定例恭遇巡幸經過地方旗租應隨民地請蠲及奉

旨准蠲旗租並未指明分數者概以三分爲率此次初奉恩旨雖未指及旗租而續有各項旗租一體蠲免之



諭似應於例准隨同民地請蠲三分外再將蠲贖租銀一體全行蠲免又賞給農民籽種銀兩應無論民糧旗租地畝除隙地不計外凡種有麥苗平毀者一體給賞以廣

皇仁以上三項臣已咨部核覆辦理所有遵化州並非經由地面照案應行剔除並應蠲糧租照例分別核辦各緣由理合恭摺具陳伏乞

皇太后

皇上聖鑒訓示謹

奏

賑撫收支實數摺

光緒元年十一月初三日

奏爲查明同治十一十二兩年續辦賑撫案內收支米糧棉衣銀

錢實數照案開單彙報請免造冊恭摺仰祈

聖鑒事竊照同治十年直屬雨水成災經臣奏准籌撥款項並勸

南省及本省官商集捐分別賑濟以工代撫業將十一年七月以

前收支各數開單彙報請免造冊是年十二月二十二日奉

旨著照所請該部知道單併發欽此欽遵在案伏查十一十二兩

年夏秋之交大雨時行西北口外山水奔騰匯注以致順屬直屬

州縣連遭災患又經奏准截留江北漕米勻提藩司等款一面勸

捐濟用並欽奉

特恩指撥東南各省協款工賑並舉除順天府尹奏撥銀米專歸

順屬動用業經府尹臣奏報外其由天津籌賑局列收米糧棉衣

錢糧隨時撥發順屬直屬工賑之需自應接續開報查前次奏報  
十一年七月以前收支各數案內尙存大米六千四百九十六石  
零紅糧九百五十五石零棉衣二萬七千八百八十一件銀十一  
萬九千七百十八兩零制錢六萬三千六百串連此次新收共合  
大米十一萬七百三十五石零小米四萬九十一石零雜糧五萬  
九千一百二十石零棉衣十四萬三千七百四十五件銀九十六  
萬八千二百二十二兩零制錢七萬九千一百串除支銷外米糧  
棉衣錢文無存尙餘銀八千六百七十六兩零應歸續辦工程項  
下動用據籌賑局司道將各屬賑務及以工代撫各款收支實數  
分晰開單具詳前來臣查直隸從前辦賑皆照定例各給兩箇月  
三箇月口糧道光三年災案計撥漕米食米七十萬石帑銀一百  
八十萬兩同治十一十二兩年災區不少惟帑銀支絀連京外官

紳捐助綜計銀米各項不過道光三年十成之五勢難照例給賑且河道隄埝多被衝壞亟須設法修濬用衛農田故必變通章程賑其老弱殘疾而令少壯者藉工傭趁以期一舉兩得所有該兩年賑撫事宜均照同治十年定章確查戶口核實撫卹災重則口少而糧多災輕則口多而糧少並擇地安設粥廠饘廠收恤流民春融發給路費行糧遣散歸業由臣督飭官紳親自經理不假吏胥之手閭閻頗受實惠至以工代撫亦皆竭蹶經營使災黎有餬口之資地方獲善後之益其閒如堵築永定河北下汛十七號南四工九號漫口通州潮白河漫口挑挖天津迤東陳家溝至北塘引河霸州中亭河文安勝芳河修濬省城附近隄河及南皮縣城工等項已將辦法情形先後專案陳奏並於節次籌辦工賑摺內聲明彙開清單免造細冊臣復隨時隨事督同司道嚴密稽核凡

奏稿二十六  
工賑各款皆係實用實銷並無絲毫浮冒相應將收支實數彙開  
清單恭呈

御覽仰懇

天恩俯照奏准成案免造細冊以歸一律理合恭摺具陳伏乞

皇太后

皇上聖鑒訓示謹

奏

謹將同治十一十二兩年災賑案內籌辦各屬撫卹並以工  
代撫收支米糧銀錢棉衣數目核實開具清單恭呈

御覽

計開

原存項下

一存大米六千四百九十六石六斗二升六合

又紅糧九百五十五石七斗二升三合

又銀十一萬九千七百十八兩七錢八分九釐二毫一絲六忽

又制錢六萬三千六百串

又棉衣二萬七千八百八十一件

收數項下

一收截留江北河運粳米九萬五千七百五十二石四斗四升二

又粟米一萬一百九石六斗九升一合六勺

又隨帶備耗粟米一千石

一收天津水利局撥解同治九年徵存鹹水沽翟淀地租大米二百石

又撥解同治九年十一十二等三年徵存葛沽營田大米二百四十六石

一收官商捐賑大米五千四百四十八斗八升

又捐賑小米七千三百三十二石五斗四升五合

又捐賑雜糧八千石

一收采買大米二千六百石

又收采買小米二萬一千六百四十九石八升八合二勺

又收采買紅糧雜糧五萬一百六十五石一斗三合一勺六抄

一收官商捐賑銀十二萬二千七十七兩一錢二分二釐六毫

一收東南各省協款銀四十萬兩

一收本省藩庫撥地丁銀十萬兩

一收山海關撥解加增洋藥釐捐銀六萬五千九百五十八兩九

錢七釐

一收江浙典商借領練餉錢文應繳息制錢七萬四千二百串合

銀四萬八百一兩七錢三分七釐七毫

一收督銷蘆鹽委員借領練餉錢文應繳息制錢六千五百串合

銀三千七百六十二兩五錢一分八釐五毫七絲八忽六微

一收招商局借領練餉錢文應繳息制錢一萬四千串合銀八千

七十三兩三錢五分二釐



一收保定練餉局於江南海關協款項下撥銀七萬九千三百八

十兩

一平糶大米三千一百六十四石小米八千八百五十石五斗五  
升四合六勺五抄雜糧一萬三千三百二十二石二斗九升九合  
二勺共收價銀二萬八千四百五十兩四釐

一收官商捐賑制錢一萬五千五百串

一收官商捐棉衣十一萬五千八百六十四件

以上原存新收兩項共計

大米粳米十一萬七百三十五石九斗四升六合二勺

小米粟米四萬九千一百三十三石二升四合八勺

雜糧紅糧五萬九千一百二十石八斗二升六合一勺六抄  
銀九十六萬八千二百二十二兩四錢三分一釐九絲四忽

制錢七萬九千一百串

棉衣十四萬三千七百四十五件

支銷十一年分賑撫項下

一天津縣貧民一萬一千四百二十四戶其大小折成三萬六千六百三十一口半計發冬春撫卹漕米七千八百六十一石四升六合六勺四抄紅糧一千七百二石三斗一升三合三勺六抄運腳棚廠經費銀六百六十二兩五錢二分二釐九毫四絲一忽棉衣六千八百四十三件

一靜海縣貧民一萬二千九百六十戶其大小折成二萬七千七百三十九口計發冬春撫卹漕米四千三百石大米三千四百九十三石二斗二升九合小米二千二百二十一石九斗二升二合運腳經費銀一百二十三兩五錢三分八釐二毫棉衣五千二百

件

一青縣貧民一萬二千八百五十九戶其大小折成三萬六千三百七十三口半計發冬春撫卹大米五千四十四石二斗七升七合紅糧九百五十五石七斗二升三合棉衣四千五百件

一鹽山縣貧民六千三百九十三戶其大小折成一萬八千八百十三口半計發冬撫米折銀二千五百二十兩春撫米折銀一千六百八十兩棉衣三千九百件

一安州貧民一萬三千三十九戶其大小折成三萬四千八百四十一口半計發冬撫漕米三千一百二十石春撫漕米二千八十石運腳經費銀四百十四兩四錢一分六毫棉衣四千三百二十

七件

一雄縣貧民七千一百八十八戶其大小折成二萬一千六百四

十一口計發冬撫漕米二千八百八十石春撫漕米一千九百二十石運腳經費銀四百十九兩九錢二分三釐八毫棉衣三千五百件

一新城縣貧民四千四百七十二戶其大小折成八千二百三口半計發冬撫漕米二千一百石春撫漕米一千四百石運腳經費銀三百十八兩一錢九分棉衣二千八百九十三件

一河間縣貧民一萬五十三戶其大小折成二萬二千七百六十八口半計發冬撫漕米二千四百石春撫漕米一千六百石運腳經費銀三百六十二兩五錢五分六釐九毫棉衣四千二十件

一獻縣貧民一萬一千五百三十七戶其大小折成三萬二千一百九十九口計發冬撫漕米二千一百石春撫漕米一千四百石運腳經費銀三百八十五兩七錢四分棉衣四千八百九十三件

一任邱縣貧民一萬六千九百三十四戶其大小折成五萬五千五百三十九口計發冬撫漕米二千八百八十石春撫漕米一千九百二十石運腳經費銀三百三十七兩三錢六分六釐六毫棉衣四千二百二十五件

一安平縣貧民五千九百三十五戶其大小折成一萬三千二百口計發冬撫漕米三千石春撫漕米二千石運腳經費銀四千九十四兩七錢七分二釐八毫棉衣四千二百七十六件

一深澤縣貧民三千七百六十二戶其大小折成六千六百六十口計發冬撫漕米一千八百石春撫漕米一千二百石運腳經費銀二百九十六兩八錢六分三釐八毫棉衣二千七百六十五件

一撥順天府屬截漕粳米粟米六萬石內發通州粳米五百石三河縣粳米五百石武清縣粳米六千石粟米五百石寶坻縣粳米

六千石粟米二千石薊州粳米三千石粟米一千石香河縣粳米  
一千石文安縣粳米一萬一千石粟米二千石大城縣粳米四千  
九百八十石粟米二千二十石霸州粳米三千五百石粟米一千  
石保定縣粳米二千石固安縣粳米三千石粟米一千石永清縣  
粳米四千石粟米五百石東安縣粳米三千五百石粟米一千石  
一撥順屬棉衣二萬二千三百件內發通州二百件三河縣二百  
件武清縣二千件寶坻縣二千四百件薊州一千二百件香河縣  
三百件文安縣七千件大城縣三千件霸州一千四百件保定縣  
六百件固安縣一千二百件永清縣一千四百件東安縣一千四  
百件

一清苑縣散放棉衣一千六百件

一津郡城隍廟粥廠自十一年十一月初一日起至十二年二月

十一日止每日收養流民計大小折成九百三十一口至四千七百十八口不等共用大米一百八十二石小米一千二百五十石搭蓋窩棚購買柴薪各費銀四百六十七兩九錢一分八釐棉衣四千件

又海會寺粥廠自十一年十一月初三日起至十二年二月十一日止每日收養流民計大小折成三千六百十七口至五千五百七十六口不等共用大米八百三十五石小米一千一百十八石八斗五合五勺搭蓋窩棚購買柴薪各費銀六百五十四兩五錢四分棉衣五千二百八十件

又藥王廟粥廠自十一年十一月十一日起至十二年二月十二日止每日收養流民計大小折成二千二百八十五口至四千七百三十七口不等共用大米二百十八石小米一千四百六十石

六斗二升三合搭蓋窩棚購買柴薪各費銀五百四十兩棉衣三千九百件

又如意庵粥廠自十一年十一月初三日起至十二年二月十二日止每日收養流民計大小折成二千一百六十四口至二千三百二十三口不等其用大米四百十二石小米七百二十石搭蓋窩棚購買柴薪各費銀三百八十七兩七錢七分七釐棉衣二千六十七件

一遣散粥廠貧民共合大口一萬七千三百五十四口用紅糧一千七百三十五石四斗盤費制錢一千七百三十五串四百文  
一文安大城兩縣加賑災民共計大小折成二萬三千九百九十口計發大米一千六百三十五石銀八千八百兩運腳銀一百四十三兩六分六釐三毫棉衣三千五百件



一發固安縣撫卹趙村等二十九村災民二千五百五十戶折成一萬二千四百五十九口半計發銀四千五百四十一兩三錢棉衣三千四百件

一續買河東陳家溝義地價銀一百三十五兩六錢七分二釐  
一采買大米二千六百石價銀四千七十一兩五錢五分五釐  
一采買小米一千八百三十八石八斗五合五勺價銀二千八百三十八兩六錢五釐九毫

一采買紅糧三千四百八十三石四升三合三勺六抄價銀三千九百十九兩九分四釐一毫

一折耗粳米八百一十一石三斗九升三合五勺六抄

一折耗粟米八十九石六斗九升一合六勺

一折耗紅糧四十五石三斗三升

一江浙各省捐助棉衣由大沽運津運腳等費大錢三百七十九千五百二十四文

以上共支銷

漕米大米十萬七千五百七十一石九斗四升六合二勺

粟米小米一萬七千八百八十一石四升二合一勺

紅糧四千四百三十八石七斗六升六合三勺六抄

銀三萬四千五百十五兩四錢一分九釐九毫四絲一忽

制錢二千一百十四串九百二十四文

棉衣九萬七千三百八十九件

支銷十二年分賑撫項下

一天津縣貧民二萬八百四十四戶大小折成七萬三千六十二口計發冬春撫卹小米三千五百二十四石六斗二合一勺五抄

雜糧九千九百四十一石三斗四升七合七勺五抄棚廠經費銀  
五百二十六兩六錢六分八釐八毫六絲一忽棉衣四千一百五  
十件

一靜海縣貧民一萬一千八百五十五戶其大小折成三萬三百  
十五口計發冬春撫卹雜糧七千石經費銀五百兩棉衣三千件  
一青縣貧民二萬三千九百十八戶其大小折成十萬六千二百  
四十五口半計發冬春撫卹雜糧七千石小米四百石經費銀五  
百兩棉衣三千件

一滄州貧民一萬一千五百六十二戶其大小折成五萬二千六  
百四十二口計發冬春撫卹雜糧六千石運腳等經費銀八百兩  
棉衣三千件

一雄縣貧民六千五百八十一戶其大小折成二萬三百五十三

口計發冬撫銀七千兩春撫銀五千兩棉衣二千件

一交河縣貧民六千二百八十四戶共大小折成二萬四千八百五十八口計發冬撫銀二千八百兩春撫銀一千二百兩棉衣一千件

一高陽縣貧民六千二百七十七戶共大小折成一萬二千六百四十九口計發冬撫銀二千八百兩春撫銀一千九百兩棉衣一千件

一獻縣貧民七千一百三十四戶共大小折成二萬五千五百九十七口計發冬春撫卹銀八千兩棉衣一千件

一河間縣貧民四千六百二十一戶共大小折成七千九百七口計發冬撫銀三千五百兩春撫銀一千五百兩棉衣五百件

一安州貧民一萬七千三百四十七戶共大小折成三萬一千一

百八十六口計發冬撫銀一萬兩春撫銀六千兩棉衣一千四百件

一任邱縣貧民一萬七千四十七戶其大小折成六萬八千五百四十口計發冬撫銀七千兩春撫銀三千兩棉衣一千件

一景州貧民四百六十四戶其大小折成三千四百四十九口計發冬撫銀七百兩春撫銀三百兩棉衣五百件

一東光縣貧民九百三十五戶其大小折成五千一百八十口計發冬撫銀二千一百兩春撫銀九百兩棉衣八百件

一定州貧民二千八百七十戶其大小折成一萬三百六十口計發冬春撫銀五千四百兩棉衣一千件

一深澤縣貧民一千一百十三戶其大小折成三千八百四十五口計發銀二千兩棉衣五百件

一撥順天府屬賑撫銀八萬兩歸府尹分撥

一發順屬甯河縣雜糧二千石

一發順屬文安縣棉衣二千五百件

一發順屬大城縣散放棉衣一千五百件

一發清苑縣散放棉衣二千件

一發文安縣蘇家橋設立饑廠自十二年九月二十一日起至十

三年二月二十日止貧民一萬五千八百七十三口共發雜糧六

千石添購糧豆蒸饅用銀四千兩購買糧豆柴薪棚廠各項制錢

五千五百串棉衣三千四百六十六件運腳經費銀三百十四兩

五錢七分八釐八毫八絲

一發津郡鄉祠粥廠自十二年十一月初六日起至十三年正月

二十六日止每日收養流民計大小折成八百五十二口至六千

二百七十八口不等共用小米一千一百二十二石六斗五升搭蓋窩棚購買柴薪添購米石各項銀八百四十四兩九錢五分七釐棉衣一千三十一件

又城隍廟粥廠自十二年十月二十一日起至十三年正月二十六日止每日收養流民大小折成三千一百六十三口至六千八百四十九口不等共用小米二千三百六十五石三斗一升搭蓋窩棚購買柴薪添購米石各項銀一千一百一兩五錢八分一釐三毫棉衣三千二百五十六件

又海會寺粥廠自十二年十月十五日起至十三年正月二十七日止每日收養流民計一千一百三十七口至五千九百十三口不等共用小米一千七百八十四石四斗九升五合搭蓋窩棚購買柴薪添購米石各項銀一千二十六兩二錢九分九釐棉衣二

千五十三件

又藥王廟粥廠自十二年十一月初八日起至十三年正月二十  
七日止每日收養流民大小折成二千三百七十一口至四千七  
百五十口不等共用小米一千五百五十五石三斗六升二合五  
勺搭蓋窩棚購買柴薪添購米石各項銀八百六十八兩九錢三  
釐棉衣二千一百九十件

又如意庵粥廠自十二年十一月十五日起至十三年正月二十  
八日止每日收養流民九百五十六口至四千六百七十三口不  
等共用小米一千二百二十六石六斗三升七合五勺搭蓋窩棚  
購買柴薪添購米石各項銀四百八十四兩三錢七分五釐棉衣  
二千六百九十件

又僧親王專祠粥廠自十二年十一月初八日起至十三年正月



二十八日止每日收養流民大小折成一千三十五口至三千三百四十一口半不等其用小米一千二百三十一石四斗三升七合五勺搭蓋窩棚購買柴薪添購米石各項銀四百七十一兩七錢六分七釐七毫棉衣一千八百二十件

一遣散各粥廠流民共合大口三萬一千八百四口半用雜糧三千一百八十石四斗五升盤費制錢三千一百八十串四百五十文

一采買小米一萬九千八百十石二斗八升二合七勺價銀三萬三百六兩六錢八分九釐九毫八絲五忽

又采買雜糧四萬六千六百八十二石五升九合八勺價銀五萬九百八十五兩六分八毫三忽

一發河南采買米石委員薪水盤費銀二百十六兩三分八釐

又奉省采買米石運津水腳銀一千一百八十兩三錢二分七釐

一發平糶大米三千一百六十四石

一發平糶小米八千八百五十石五斗五升四合六勺五抄

一發平糶雜糧一萬三千三百二十二石二斗九升九合二勺

一折耗紅糧二百三十七石九斗六升二合八勺五抄

一折耗小米一百四十九石二斗三升三合三勺

以上共支銷

大米三千一百六十四石

小米二萬二千二百十石二斗八升二合七勺

雜糧五萬四千六百八十二石五升九合八勺

銀二十四萬五千二百二十七兩二錢四分六釐五毫三絲

制錢八千六百八十串四百五十文

棉衣四萬六千三百五十六件

支銷歷年以工代撫項下

一發永定河北下汛十七號漫口合龍工費銀四萬八千兩又善後工程銀四千兩

一發永定河修復南岸頭工上汛二號灰壩工程銀三萬三千八百十五兩一錢七分五釐二毫

一發順屬霸州永濟橋工銀一千兩

一發順屬涿州隄工銀六百兩

一發順屬固安縣橋工銀三百兩

一發堵築北運河東隄辛莊蒺廠白廟霍家嘴穆莊南倉等處漫口壩工共銀八千五十一兩七錢二釐二毫制錢四百三串六百

文

一發堵築天津北運河柳灘河隄漫口壩工銀二千九百五十六兩四釐一毫二絲

一發堵築靜海縣南運河太陽宮菩薩廟邢莊等處漫口壩工並修獨流疊道土工共銀二千七十八兩一錢四分四釐四毫八絲

一發堵築天津北運河葡萄園小關莊窯窪新莊余莊郝家嘴等處漫口壩工共銀一千九百八十九兩九分

一順天堵築潮白河工程撥給銀二萬兩

一發永定河南四工九號漫口合龍工程銀八千兩

一發安平縣修築護城河隄工銀二千兩

一發滄州挑挖倉上蘇家沽減河銀三千二十二兩九錢八分三釐

釐

一發接修滄州捷地減河南北兩岸月隄縷隄並填築馬道挑濬

溝渠各工銀一千六百三兩二錢又制錢一萬三千四百五串八百六十四文

一發開挖順屬文安大城引河並做石閘石壩涵洞橋座各工銀三萬七千四百八十九兩四錢九分一釐九毫又制錢二萬二千七百三十四串一百三十六文

一發開挖順屬霸州中亭河並堵築老隄村漁津窩缺口壩工銀五百九十一兩二錢五分六釐又制錢二萬四千五百一十一串二十六文

一發天津縣修築鳳河東隄工程銀三千兩

一發修築子牙河南隄銀一千兩

一發堵築天津縣陳家溝東引河壩工銀一千五百四十五兩四錢二分三釐七毫

一發天津南運河芥園大小稍直口小園東西灣兜營門外北斜村等處壩工銀一萬三千八百六十兩五錢七分五釐

一續發南皮縣城工銀八千四十九兩九錢六分四釐

一發永定河修復北三工灰壩開挖壩外減河銀四萬六千八百八十兩

一發順屬固安縣挑挖護城河銀二千五百兩

一發修濟省城附近隄河工程銀六萬六千三百兩

一發堵築通州潮白河漫口工程用銀五萬兩又善後工程銀三千兩

一發開挖筐兒港新減河工程銀三萬四千五百四十三兩二錢四分六釐六毫

一發修築筐兒港河頭南北石壩臺等工程銀三千五百五十兩

一發展寬七里海下口淮魚淀減河銀一百六十七兩一錢二分

一發挑挖天津迤東陳家溝河道接開減河至薊運河止工程並

河身佔用民田地基給發地價等項銀共十五萬六千七兩七錢

九分三釐二毫二絲五忽

一發修建買家大橋等五座並添設渡船各項工程銀一萬一千

二百八兩四錢七毫

一發修築順屬文安縣千里長隄銀一萬五千一百三兩三錢六

分三釐八毫一絲四忽又制錢六千七百五十串

一發修築順屬保定縣千里隄工銀二千三百四十四兩三釐

一發修築順屬大城縣格淀隄工銀二千二百八十八兩又制錢

五百串

一發修築順屬保定縣于家窪南埝並壩工銀五千五百兩

一發開挖河間獻縣滹沱引河並新築疊道建橋建閘等工銀二萬四千九百兩

一發修建天津縣洋碼頭橋梁銀一千二百十三兩七錢二分二釐

一發修築南運河芥園以西隄壩各工銀一萬一千一百八十兩

一錢三分

一發築做天津單街泊岸灰石隄工迎水壩攔水埝銀一萬五千兩

一發開挖文安縣勝芳下游河道並築隄銀二萬四千五百七十四兩六錢六分四釐

一發修建軍糧城東西中渠橋座銀五百九十兩八錢八分

以上共支銷銀六十七萬九千八百兩三錢三分二釐九毫



三絲九忽

制錢六萬八千三百四串六百二十六文

實在項下

米糧錢文棉衣無

實存銀八千六百七十九兩四錢三分一釐六毫八絲五忽六微  
仍歸續辦工程項下動支月報合併登明

潮白河工程請獎摺 光緒元年十一月初三日

奏爲通州潮白河合龍後續辦隄工及防汛事宜完竣將出力人員擇尤請獎恭摺仰祈

聖鑒事竊上年六月閒北運河上游潮白河東岸平家疇漫決二百餘丈大溜趨入箭桿河欽奉

諭旨著妥爲籌議辦理經臣派委候補道周馥候補知府徐本衡前往勘度籌定辦法卽飭該道等遴帶員弁會同通永道英良核實經營於八月底興作分別挑河進占至十月初引河挑挖通暢口門搶堵合龍大溜復歸北運河故道業將情形兩次

奏報聲明俟善後防守事宜告竣再將在事人員擇尤請獎在案原定大壩東西兩頭各築長隄約攔漲水復據該道等察酌地勢東頭長隄應築一千餘丈西頭長隄至順義縣盧各莊止應築一

千四百餘丈再於西頭加築護村隄七百四十丈頂寬一丈五尺至三丈底寬四丈至七丈五尺高五尺至九尺不等飭於合龍後就原有民夫趕築並將佔用民地酌發價值麥種其餘善後工務今春一律辦竣復令委員駐工防汛伏秋之際塞外諸水奔騰匯注疊次盛漲六月二十五日連底水漲至二丈二尺有奇勢甚危險均經該員等督率民夫搶護穩固先後稟報前來臣查此河爲北運來源其東南下游卽通州等六州縣若決口不堵則漕糧運路不通地方被災甚廣關繫

天庾民生極爲重要在事人員躬歷危險剋期堵合復防守伏秋大汛全工穩固漕運農田均無貽誤實屬有裨大局謹擇其尤爲出力者酌擬獎敘另繕清單恭呈

御覽仰懇

天恩俯准給獎以示鼓勵至此項隄壩工程嗣後須責成官民認真修守應令通州順義縣各按界址督飭民夫依時培修實力防守並酌撥弁兵常駐平家疇專司其事由坐糧廳通永道隨時會同督察妥辦籌給經費嚴核賞罰以期經久不廢除俟核定章程咨行飭遵外理合會同兼管順天府府尹臣萬青藜順天府府尹臣吳贊誠倉場侍郎臣延煦臣畢道遠恭摺具陳伏乞

皇太后

皇上聖鑒訓示謹

奏



謹將搶辦通州潮白河合龍並防汛尤爲出力人員擬請獎敘恭呈

御覽

計開

鹽運使銜卽補知府徐本衡知府用通州知州高建勳同知銜候補知縣姚鎔滄州李村巡檢唐維藩藍翎知府銜候補同知寶延馨藍翎同知銜候補知縣鄭衍恆陶鈺等七員躬歷危險搶辦穩固並防守大汛出力徐本衡請俟補知府後以道員儘先補用高建勳姚鎔均請

賞戴花翎唐維藩請

賞戴藍翎寶延馨鄭衍恆陶鈺均請

賞換花翎教習期滿候選知縣黃樹田候選主簿何銳候選從九

葉梯雲知州銜李恩銘書吏李淩漢等五員名隨同搶辦防守並稽查催趨不辭艱苦黃樹田請以本班儘先選用何銳葉梯雲均請以本班分發省分儘先補用李恩銘請加四品銜李淩漢請以巡檢不論雙單月儘先選用

津郡新城竣工摺

光緒元年十二月十八日

奏爲津郡建築新城礮臺督飭防軍工作並陸續籌撥欠餉以作經費現已一律工竣恭摺奏報仰祈

聖鑒事竊臣於同治九年十一月議設津海關道事宜摺內聲明津郡城外地勢散漫無險可守擬就運河北岸圈築新城爲經久防患之計是年十二月內遵

旨妥議籌辦天津設備事宜摺內復以圈築新城爲海防第一急務惟南北運河之交市廛櫛比收買民地購料興工需費甚鉅無款可籌擬就各省解存津局練餉制錢項下撙節動用又於同治十年十月添設大沽協海口六營酌定營制章程摺內查明大沽海口後路三十里之新城地方形勢扼要擬就該處建造衙署圈築土城與大沽礮臺前後接應俟籌有款項卽行估建先後奏蒙



聖鑒敕部議准在案嗣經臣親往察勘新城濱臨海河爲洋舶入口所必經實屬海防門戶最要關鍵建置不容稍緩估計土方工料夫價需用浩繁卽力求節省亦非鉅款不辦因與統領盛仁等軍遇缺簡放提督直隸天津鎮總兵周盛傳商令該軍弁勇合力工作以省雇募民夫之費而購料集匠經費尙無所出周盛傳以事關重要亟與各營將領商勸願將所部二十餘營積年欠餉儘數報效飭由後路糧臺陸續籌提解用以成大役復以內地城垣礮臺皆用磚石砌成質堅而脆炸礮轟擊易於摧裂新城旣專爲海防而設必以力求堅厚堵禦礮火爲要擬參用泰西新法並以石灰沙土三項加糯米糝和爲三合土錘鍊夯礮打成一片俾可堅固耐久又因需用石灰太多遠道購運費力詢之漁戶居民僉稱海濱蛤蜊可以燒灰功用與石灰相埒用費較省因卽雇集漁

艇在沿海各處載運自砌灰窯數十座廣燒應用此皆臣於幾經  
審度之後妥爲圖維復於無可節省之中力除浮費區畫既定仍  
將該軍隊伍拔赴新城圈定城基派分工段先將地盤基址填築  
高厚然後分別興修嚴立程課計自同治十二年三月起至十三  
年十月每於春融開工冬凍停作統計築成內外城垣兩道其內  
城一道周圍九百八十四丈下半係磚身砌高一丈九尺厚七尺  
五寸內包素土腳砌石條兩層上半垛牆係灰土厚二丈二尺高  
五尺五寸裏墜高二丈五寸外包三合土五尺城腳計寬七丈頂  
上海塹走道連垛牆共寬五丈五尺四城門券各進深十六丈外  
長二十五丈五尺上城馬道高三丈一尺三合土加築堵牆至頂  
高四丈四尺又外護城一道周圍一千一百二十八丈牆身高一  
丈七尺腳寬五丈頂寬三丈五尺外包三合土五尺裏面包三合

土四尺內外城垣凡磚與土相交灰土與素土相交處每隔八尺各穿做三合土橫丁字式咬牆一道咬深五尺取其銜結黏連經久不壞內城四門不用門樓磚券之頂卽做礮臺式樣橫安礮房上面厚覆三合土承以巨柱四旁橫托大木圍垣均係三合土深厚加倍房內可容百人下留門洞四面鑲板兼儲子藥城上不用磚堞用灰土築厚二丈二尺爲堵牆均作斜坡勢每隔十丈築小礮臺一座四圍共計小礮臺七十一座城腳下用木椿仍密布灰椿以禦壓力城內擇要處分建大礮臺三座平地矗立每座底腳周圍六十丈頂圍四十八丈二尺下做磚券窰洞十箇內有伏道用磚旋轉而上外圍金剛平水牆用磚砌高一丈六尺上接三合土牆一丈八尺開暗礮門九處明礮臺十處臺心做大礮棚一座中留空地爲子藥庫兼藏駐礮兵加三合土層築至頂共高五丈

二尺可俯瞰數十里之外其外城河挑通海河周圍一千八百七十一丈五尺河面寬十二丈底寬五丈五尺深一丈七尺舟楫可行其裏城濠周圍八百四十丈面寬四丈深一丈其三大礮臺並環以外濠與城濠相通城內東西水關兩座通長十一丈高六尺中寬五尺兩面出腳寬二丈三尺四寸城外通海河水閘兩道節宣潮汐閘口寬一丈七尺下寬一丈六尺三寸灰土下腳墁石寬五丈五尺二面邊石砌高一丈四尺南門外大橋一座長十二丈五尺面寬一丈四尺雁翅斜寬四丈五尺高二丈二尺五寸加以城內外兵房涵洞界牆小橋各段零工不可記數統其用大城磚二百三十二萬一千五百有奇料半磚一千七百五十六萬二千有奇方磚一萬九千塊槽子磚一萬二千塊三合土十一萬二千六百三十餘方石灰十三萬七千六百九十一石蛤蜊灰一百七

十八萬九千四百七十餘石石條五千二百八丈灰木椿十三萬  
五千四百五十餘根其餘鐵器木器糯米白礬葦柴麻斤各項料  
物稱是共用銀五十二萬七千七百兩稟經臣親往勘驗復飭將  
城內大礮臺頂上仿西洋隔堆之法每臺添做券洞四處縱橫交  
貫可多藏藥彈礮兵兩面金剛牆皆寬七尺中間走道寬八尺高  
七尺磚券上覆三合土八尺四寸形勢橢圓以禦礮彈又慮三合  
土壓力太重令將臺腳各加厚九尺內灰外磚層層築做高一丈  
八尺均於本年十月內一律竣工續用銀二萬六千五百四十兩  
零統共用銀五十五萬四千二百四十兩有奇均歸該軍欠餉內  
核算飭委候補道周馥知府史克寬等前往逐細驗收查明毫無  
草率浮冒等情具覆前來伏查津郡屏蔽  
京師爲北洋重地目前籌布海防僅恃大沽北塘海口礮臺氣勢

尙形單薄必須於後路築城設險屯駐重兵互相援應緩急方可  
有恃臣受任以來夙夜兢兢不敢不殫竭心力綢繆未雨自勘定  
新城基址後卽妥商辦法督飭該軍併力興築臣逐年疊次赴工  
與周盛傳暨各將領商度諮詢務求格外堅實其有關於禦侮之  
方者不憚變通成法以盡一得之愚尤不惜倍增工力以收萬全  
之效今幸將士用命全工告成其土方之鉅灰料之多實他處工  
程所僅見從此海口孤臺可得掎角之勢於防務大有裨益臣之  
初議原擬就津郡北岸圈築一城嗣因該處民居稠密遷徙不易  
且距沽口稍遠難資控扼再四籌度惟新城切近大沽後路又係  
舊建城基亟應乘時設法興築所需經費前議酌提津局練餉制  
錢已奉戶部覆准適直境連年水災籌辦賑撫業將前項制錢奏  
明發給江浙典商及輪船招商局蘆鹽公局分領生息已無存儲

而工需萬緊又值帑項支絀之際未敢率請飭撥賴周盛傳暨該  
軍將士深明大義願將積年欠餉儘數報效臣疊催各省將額撥  
淮軍協款源源濟用三年以來竭蹶經營幸而歲事尤非初念所  
及刻下城工告竣所有添兵設守建置衙署營汛購備洋礮守具  
一應事宜容臣督飭次第察酌奏明辦理除出力各員由臣附片  
奏懇

恩施並咨明總理衙門戶兵工各部知照外所有籌款建築津郡  
新城礮臺要工告竣緣由理合專摺具陳伏乞  
皇太后

皇上聖鑒訓示再此項工需係動用該軍欠餉應請

敕部免其造冊報銷合併陳明謹

奏

新城工程請獎片

光緒元年十二月十八日

再查新城地方前於雍正年間建立水師都統衙署築有土城嗣因員缺撤城署久廢此次周盛傳承辦要工馳往相度舊城基址已不可辨識另行審擇地段扼要興修當其版築之初一片荒墟事事皆同創始濱海之地暑溼侵蒸易生疾疫斥鹵卑下土質鬆浮尤難措手所築城垣礮臺係參用西洋做法與內地建造成法迥不相同工力亦相去倍蓰該軍自分認地段後闔營哨弁兵夫負土加礮爭先并力登憑邪許之聲往往更定月明猶相應和盛暑烈日旁午弗休竭萬人之力逾兩年十閱月之久胼胝經營不辭況瘁成此鉅工鞏衛海疆核其勞苦勳績實較身臨前敵衝冒鋒刃者難易攸殊城臺竣後各國洋人往來查探爭相傳播新聞紙於北洋海防聲勢增壯周盛傳係現任總兵實缺大員主持



全工獨爲其難於餉需竭絀之際既督弁勇以力作復捐欠餉以圖成體國之公忠辦事之認真布置之精密皆非諸將所及雖據稱不敢仰邀議敘應請

旨交軍機處另行存記遇有提督缺出先行簡放以爲專闈出力者勸至該軍統帶記名提督直隸通永鎮總兵唐仁廉記名提督貴州安義鎮總兵周壽昌記名提督署直隸通永鎮總兵吳殿元記名提督衛汝貴賈起勝均謀勇兼優堪勝專闈擬請

旨交部從優議敘吳殿元衛汝貴賈起勝三員並請

旨存記簡放實缺提督銜記名總兵陳連陞初發祥孫顯寅均擬請俟得總兵實缺後以提督記名

簡放記名總兵姚禮士張兆海朱冠軍鄭才盛周家瑞均擬請

賞加提督銜總兵銜兩江補用副將周盛佑杜萬青周家泰均擬

請

旨交部從優議敘按察使銜山東候補道吳秉權擬請

賞加布政使銜五品銜直隸試用知縣戴宗騫擬請俟補缺後以直隸州知州補用並

賞加運同銜以示鼓勵其餘實在出力文武員弁可否由臣查明擇尤保獎俾勵戎行伏乞

聖鑒訓示謹附片具

奏



近省續辦隄河各工摺

光緒元年十二月十八日

奏爲附近省城地面續辦隄河各工丈尺用過銀數照案開單奏報免造細冊仰祈

聖鑒事竊查同治十一年水災案內因各屬隄河必須濬築奏請提撥司庫地丁練餉局協款以工代撫事竣開單奏報免造細冊奉

旨著照所請欽此十二年水災復奏明工賑並舉已將附近省城地面歷辦隄河各工丈尺用過銀數於上年十二月開單奏報聲明尙有另辦工程俟事竣續行奏報等因各在案查新城雄縣等境前已開挖蘆僧減河以分清河上游之水由中亭河歸淀因該減河地處窪下勢若建瓴盛漲恐致奪溜須在新城十九堡河頭建築灰壩一座以資節宣又任邱鄭州一帶疊道係七省衝衢

積年冲刷僅存基址應自十方院起至南塔村止於水中撈築修築擇要釘樁鑲葦俾通驛路又新城大清河安仁村河形拗折應自青凌壩以下起至十九堡村西北止開挖直河裁去舊河大灣並於河頭分築攔河挑水各壩使水流暢順不致套刷隄岸以上各工均經清河道葉伯英駐工督飭印委核實修辦工竣覆驗丈尺相符做法穩固共計由練餉局撥給銀二萬九千五百九十兩又同治十二年正定縣修復滹沱河斜角迴水二隄並漕馬口隄所需工費已於是年二月奏明將清河道庫存同治八年奏銷以後至十一年十二月止滹沱河生息銀七千九百餘兩儘數動用以工代撫免造細冊嗣因所費不敷復於該道庫續收生息項下撥給銀二百兩委驗丈尺做法亦屬如式穩固茲據該道葉伯英會同藩臬兩司彙案具詳前來臣逐一確核毫無浮冒除議定善

後章程妥爲修守外所有續辦隄河各工丈尺用過銀數理會照  
案分晰開具清單恭摺具

奏伏乞

皇太后

皇上聖鑒敕部知照謹

奏



謹將附近省城地面續辦隄河各工丈尺用過銀數開具清單恭呈

御覽

計開

一新城縣蘆僧河頭建灰壩一座金門口寬二十丈龍骨脊連迎水坡出水坡共進深二十二丈外接迎水簸箕出水簸箕各進深一丈各寬二十三丈兩金牆高龍骨八尺各長四丈兩壩臺高一丈五尺各長四丈迎水出水四雁翅高一丈二尺迎水雁翅各長七丈出水雁翅各長五丈共用銀一萬六千八百九十八兩三錢九分七釐四毫

一修築任邱縣疊道工長一千九百五十一丈七尺修成頂寬二丈底寬四丈高六尺共用銀八千七百九十一兩八錢八分七釐



四毫六絲

一新城縣大清河安仁村開挖直河工長三百四十一丈挑成口寬八丈至十二丈底寬四丈至七丈深八尺至一丈一尺不等共  
用銀一千七百五十四兩四錢一分

又舊河口新河頭築壩二道共工長一百丈頂底均寬四丈高一  
丈共用銀二千二百五十兩二錢

一正定縣修復滹沱河斜角迴水溝馬口等隄共工長三千一百  
十四丈九尺修成頂寬二丈底寬五丈高七尺至一丈共用銀八  
千一百三兩四錢二分六釐一毫八絲

以上各項工程共用銀三萬七千七百九十八兩三錢二分

一釐四絲除由練餉局撥給銀二萬九千五百九十兩清河  
道生息項下撥給銀八千一百三兩三錢三分一釐八毫全

數支用外計不敷銀一百四兩零已照數籌補理合陳明



營員請給封典片

光緒元年十二月十八日

再臣軍馬步各營隨同轉戰數省勦平髮捻等逆在事文武人員疊因勞績存保官階祇以留防南北各省未能赴選赴補得缺恭逢

覃恩慶典未獲同被

榮施不免向隅伏查前

欽差大臣曾國藩於咸豐六年三月間奏奉

上諭軍營保舉各員選補尙無實缺自應先被光榮著按照羅澤南李續賓給予封典前旨按照原保升階咨部給予封典其有告假回籍者概不准給以示區別而勵戎行等因欽此又咸豐十年六月十五日奉

上諭曾國藩奏在營出力文武各員恭遇覃恩援案懇給封典等

語儘先副將陳發翔等卓著戰功雖尙未補實缺著准其援照奏  
准前案均按各員陞銜給子封典以示鼓勵等因欽此是候補候  
選各員在營出力歷准請給

封典有案臣部現留軍營帶隊人員均係勦辦髮捻戰功卓著茲  
恭逢同治十一年十月初九日十二年二月初十日及光緒元年  
疊次

覃恩

恩詔慶典該員等在營未能赴選赴補得缺核與歷屆奏准軍營  
保舉人員請給

封典成案相符合無仰懇

天恩俯准援案辦理以勵戎行除將各該員履歷造冊分咨各衙  
門查照外理合附片具陳伏乞

奏聖鑒訓示謹

卷二十六

李文忠公奏稿卷二十六